

٧٤٤٣٣

مذكرات ميتة  
أحمد خليفة



مذكرات مينة  
أحمد خليفة  
الطبعة الأولى ، ٢٠١٠



دار اكتب للنشر والتوزيع  
القاهرة ، ١٠ ش عبد الهادي الطحان ، المرج  
موبايل : ٠١١٠٦٢٢١٠٣  
dar\_oktob@gawab.comE – mail :

المدير العام :

يحيى هاشم

تصميم الغلاف :

كريم آدم

تدقيق لغوي:

سارة سرحان

رقم الإيداع : ٢٠١٠/٢٢٠٢٠

I.S.B.N: ٩٧٨- ٩٧٧- ٤٨٨- ٠٧٠- ٤

جميع الحقوق محفوظة ©



# مذكرات ميتة

أعدها للنشر

أحمد خليفة

الطبعة الأولى

٢٠١٠



دار الكتب للنشر والتوزيع







(من صفحة الحوادث، جريدة ----- / ٢٣ مارس)

مصرع طالبة جامعية في حريق غامض بغرفتها..

كتب - أحمد فؤاد:

لقيت طالبة جامعية مصرعها في حريق بغرفتها، بينما أصيب والديها بإصابات طفيفة إثر محاولتهما لإنقاذها.

وكان المقدم ----- مشرف غرفة عمليات مطافئ الجيزة قد تلقى بلاغاً بنشوب حريق في عمارة سكنية بشارع عبد العزيز آل سعود بالمنيل.. فتوجّهت على الفور سيارة إطفاء للموقع بأشراف اللواء ----- مدير الإدارة العامة للدفاع المدني والإطفاء بالجيزة، حيث تبين مصرع طالبة جامعية، وهي نادية سالم (١٨ سنة)، إثر احتراقها في غرفة نومها. وتمكّن الفريق من إخماد النيران قبل اندفاعها لباقي المبنى. ولكن بعد الانتقال والفحص لم يتمكن فريق الخبراء من إيجاد سبب واضح لنشوب الحريق في غرفة نوم الضحية، فتم إبلاغ اللواء ----- مدير الإدارة العامة لمباحث الجيزة بوفاة فتاة في ظروف غامضة في حريق بالمنيل، وأمر اللواء بإخطار النيابة التي تولّت التحقيق...







إنك على وشك أن تقرأ نسخة مطابقة من نوتة مذكرات  
نادية سالم.. لقد قمتُ فقط بترتيب الصفحات تاريخياً،  
وإضافة بعض الملاحظات لمساعدة القارئ على فهم ما كانت  
تقصده نادية.

أحمد خليفة







دي أول مرة في حياتي أفكر إلي أكتب مذكراتي.. أنا كنت فاكرة إن الحاجات دي بتحصل في الأفلام وبس.. بس النونة دي جات لي هدية، وابتدت تغريني بسلوفاتها، والقطعة المكبظة المرسومة على الغلاف، فقلت لنفسي إن أنا مش حاخسر حاجة لو ابتديت أكتب الحاجات اللي بتحصل لي كل يوم، أو حتى كل كام يوم.. أنا محتاجة إلي أفضفض، فعلًا محتاجة.

أنا مش باحب الكتابة.. كثير من أصحابي في المدرسة بيكتبوا شعر، غرام وشوق وحب مقطع بعضه، بس أنا بازهق من الكلام ده.. أنا عارفة إنهم بيكتبوا الحاجات دي علشان هما فاكرين الحب كله رومانسية وورد وبوس.. أنا نفسي إن الحب يطلع كده، بس أنا حاسة إنه في الحقيقة مختلف.. أنا نفسي أصاحب. سني يسمح لي، بنت عندها ستة عشر سنة المفروض تعرف ولد، تحس بالحب.. لو هو بس يُصلي...

أنا معجبة بيه من وأنا في إعدادي، بس هو ولا هنا.. على طول عايش في دور الفنان، يرسم ويكتب شعر ويلعب بيانو، ولا هو داري بيًا أساسًا.. بس لو يعرف أنا أد إيه نفسي إنه يكلمني.. يعبرني.. أنا مش مصدقة إلي كتبت كل ده، فكرة المذكرات دي شكلها مش وحشة.



الأجازة قربت تخلص، وأنا خلاص حاموت من الزهق..  
الأجازة السنة دي كانت مملة موت.. المصيف مع أهلي زي  
كل سنة، قابلت أصحابي اللي مع أهلهم زي كل سنة..  
اتحرقت.. قصدي أخذت لون زي كل سنة، رجعنا القاهرة  
وروحنا النادي لغاية لما مُتنا زي كل سنة.. أنا حاسة إني  
شوفت كل حاجة وروحت كل حته ممكن تتراح في البلد..  
هل بقية حياتي حتبقي كده؟ مملة.. كل حاجة أتحرقت.. واليوم  
طويل وما بينتهيش؟ أنا لغاية السنة اللي قبل اللي فاتت، كنت  
باستنى الأجازة دي كأها الجنة، ولما كانت بتيجي كنت باحس  
إن الأربع شهور دول بيطيروا هوا. السنة دي في حاجة  
اتغيرت، أنا حاسة بنوع جديد من الزهق، كأن الدنيا ابتدت  
تقدم، كأن مافيش حته تتراح، ولا حاجة تتعمل.. لما قلت  
الكلام ده لماما قالت لي إن أنا بامر بسنين صعبة (قصدها  
المراهقة طبعاً)، وإن أنا طبعي حبيبي لي "تقلبات مزاجية"..  
أنا باموت في ماما، وباحس إنها أطيب ست في الدنيا، بس في  
الحقيقة هي مش فاهمة أي حاجة عني.. هي في وادي وأنا في  
وادي تاني خالص.. هي مش فاهمة قصدي، مش فاهمة اللي أنا  
بأمر بيه.. أنا حاسة إني مخنوقة.. حاطق.



أنا مش مصدقة! أنا مش مصدقة اللي حصل! أنا حاسة إني هبله، وطايرة، ومتخدرة، وكل حاجة في نفس الوقت. أنا قابلته في النادي وكلمته.. هو كلمني! مريم عرفتني عليه وأعدت معاه لوحدي (مريم الحبيثة كانت محضرة خطة علشان تطبطني)، وبعد ما أعدت أنهته لمدة خمس دقائق، هو اتكلم.. ولما سمعت صوته وحسيت أد إيه هو كمان متخلبط، هديت وحسيت إن ضربات قلبي ابتدت تهدا تاني.. العشر دقائق اللي أعدتهم معاه كانوا من أجمل عشر دقائق في حياتي.. أنا مش مصدقة هو نخجول أد إيه.. مكانش بيص لي في وشي إلا مرة كل شوية، وكان بيضحك كثير، أكثر مني.. اتكلمنا عن المدرسة وقرفها، وعن ميس أمينة الناظرة الحيزيون - زي ما إحنا بنحب نقول عليها في المدرسة، وهو ضحك على كل حاجة قلناها.. لما رجعت تاني لمريم ونادين وباكينام أعدوا يسألوني على كل حاجة حصلت، وعلى كل حاجة اتكلمنا فيها.. قتلهم كل حاجة، ومريم طبعا ما رحمتيش، وقالت لي إن أنا مديونة ليها بخدمة "جامبو" علشان هي طبططني مع أحمد.

المهم دلوقتي إن أنا حاقبله تاني بكرة.. أنا مش مصدقة!



الأجازة خلاص خلصت، والمدرسة حتنيل وتبتدي بكرة..  
أنا حاسة إن السنة دي حتبقي طوييلة! بس على الأقل هي  
آخر سنة، وبعد كده حاخش الجامعة.. وكمان السنة دي أنا  
معايا أحمد.. أنا مش عارفة من غيره كنت حاقددر أستحمل  
السنة دي ازاي؟!



أنا حاسة إن أنا اتغيرت، إن أنا كبرت.. امبارح قابلت أحمد في النادي.. أعدنا مع بعض من الساعة خامسة لغاية الساعة تسعة.. زي ما أنا دلوقتي متعود، اتكلمت معاه في كل حاجة.. اتكلمت معاه عن المدرسة، عن فريق السباحة اللي أنا قررت إنني أسيه، وعن حاجة عمري ما قلتها لحد أبدًا قبل كده، (غير أمي اللي افتكرت إن أنا باهذر)، وهي إن أنا طول عمري كان نفسي أطلع ممثلة.. أحمد استغرب جدًّا، والتعبير اللي ظهر على وشه لما قلت له كان يضحك أوي.. بس هو فنان ويعزف على البيانو ويرسم ويألف موسيقى، فأنا كان عندي إحساس إن هو مش حيتخض أوي زي ناس تانية.. وفعلاً هو شجعني، وقال لي إن أنا المفروض أعمل اللي أنا عايزاه، وإلا حاعيش تعية..

لما قال لي كده حسيت إن أنا باحبه.. الفكرة رعبتني.. أنا حاسة إنني ممكن أكون لسه مش فاهمة الحب يعني إيه بالظبط.. أحمد هو أول واحد أصاحبه في حياتي، وأول ولد أبقي قريبة منه فعلاً.. هو صحيح أجمل وأذكى وأطيب واحد قابلته في حياتي، لكن أنا خايفة.. مش عارفة ليه، بس أنا خايفة.. أنا حاسة إن هو كمان خايف، لأنه هو برضو حاسس باللي أنا حاسة بيه.. إن إحنا داخلين في حاجة يمكن نكون مش أدها.



أنا النهارده اتأكدت إن حياتي اتغيرت وعمرها ما حترجع ثاني زي الأول.. أنا كنت مع أحمد وكنت عارفة إن أنا مش حاقد أشوفه غير ساعة واحدة.. أنا كنت بأقول لمامي إن أنا لسه باحضر التمرين، وده كان بيديني فرصة إني أقابله في النادي أيام التمرين وأعد معاه لغاية الساعة سبعة.. النهارده أعدنا ساعة واحدة.. هو قال لي إنه بيحبني، وأنا زي الهبله عيَّطت وما ردّتش عليه.. قرب مني وباسني لأول مرة.. شفايفه كانت بتترعش، وكنت سامعة إنه بيتنفس بسرعة.. شفايفه كان طعمها سحابر، ولكن بالرغم من كده، كان أجمل طعم دوقته في حياتي.. هو باسني بالراحة، ببطء وبخوف.. أنا شفايفي ما ترعشتش، قلبي ما دقش بسرعة.. بالعكس، حسيت إن أنا هادية، باحلم، باعمل حاجة صح، حاجة كان المفروض أعملها من زمان.. شفايفنا بعدت عن بعض، وهو مسح دموعي بإيديه.. لحظتها جسمي كله اتأار وبدأ يترعش.. لمستته ساعات بتعمل في كده، النهارده لمستته دمرتني.

أعدنا نبص لبعض من غير ما نتكلم، هو ابتسم قبلي وبعد كده أنا ابتسمت.. هو كان لسه مضطرب، وأنا كنت عارفة إن لواحد خجول زيّه خطوة زي دي كانت أد إيه صعوبة عليه، بس هو خدها علشان.. حضنته جامد أوي، وسمعت قلبه بيدق بسرعة رهيبية في صدره.. وقتها اتأكدت إني باحبه.



النهارده مريت بحالة غريبة أوي.. حسيت إن أصحابي كلهم عرفوا اللي أنا عملته مع أحمد.. أنا عارفة إن أنا ما عملتش حاجة غلط، أنا بوست الولد اللي أنا باحبه.. بس برضو حاسة إنه كله بيُص لي بطريقة غريبة.. هل ممكن يكونوا عرفوا؟ بس ازاي؟ أنا متأكدة إن ما حدش شافنا، وأنا عارفة إن أحمد لا يمكن يقول لحد.. لا يمكن.. غالباً أنا بيتهيأ لي.

أنا قلت لمامي إن أنا مش حاروح التمرين بعد كُذّه، لأني ما عنديش وقت السنة دي، ولأني محتاجة كل وقتي علشان المذاكرة.. الثانوية العامة وقرفها.. مامي اقتنعت.. فقلت لها إن أنا حابقي برضو أروح النادي علشان أذاكر هناك مع أصحابي.. ما عجبهاش الكلام أوي، بس في الآخر ما مانعتش.. بابا هو اللي مانع وقال إنه مش قادر يتخيل إن في أي حد ممكن يعرف يذاكر في الموريسستان ده.. أنا قلت له إن كل أصحابي بيذاكروا هناك، وإن جو النادي بيساعد على التركيز.. زعق واعترض كالعادة.. هو بس بيتدخل في أي حاجة تخصني لما بيعبس إن هو مش قادر يفهمني أو يفهم تصرفاتي.. عايز يعيش علياً دور الأب وخلاص، رغم إن أنا متأكدة إن هو ما يعرفش أنا سني كام بالظبط، ولا أسامي



أغلب أصحابي.. هو بس عايز يضايقيني ويسيطر عليّ  
وخلّاص.. قلت له إن أنا مستعدة أذاكر في أي حنة حتساعدني  
أحيب نتائج السنة دي، وإن هو لازم يفهم إن الظروف  
اختلفت عن أيامه، وإن دلوقتي الناس ممكن يذاكروا ويركزوا  
في أي حنة؛ لأنهم اتعودوا على الدوشة والزحمة.. فضل يزغق  
وبعد كده دخل ينام.. ما فهمتش هو حيمعني ولا لأ، بس  
كنت عارفة إنه حيحاول.



قابلت أحمد النهارده، أول مرة من أسبوع.. بابا طلع إنه حاططني في دماغه، وكالعاده ما بيتقش فيا.. معني من إني أذاكر في النادي أكثر من مرة واحدة في الأسبوع.. المشكلة إن أنا وأحمد مش عارفين نظبط مواعيدنا مع بعض.. ما بين المدرسة والعائلة والدروس، مش عارفين نتقابل.. بس النهارده عرفنا.. هو فكرني بصوت قلبه.. وأنا فكرته بطعم شفايفي.. هو بيقولي إن شفايفي طعمها زي الفاكهة، زي الفروالة.. أنا قلت له إن هو عارف إن أنا ما بحطش روج، فقال لي إنه عارف، وإنه عايز دائماً يلمس شفايفي بطبيعتها، وطلب إني أوعده إني عمري ما أحط روج لما أكون حاقبله.. وعدته.

فجأة وأنا باكتب دلوقتي، ضربت في دماغي فكرة بشعة.. إيه اللي حيحصل لو أهلي شافوا المذكرات دي؟ ماما حتنهار، وبابا ممكن يموتني، يقتلني، بجد. أنا كنت فعلاً هيلة إني ساياها كده في أوضتي.. أي حد كان ممكن يلاقها.. أنا ابتداءً من النهارده حاشيلها في درج مكنتي وحاقل عليها بالمفتاح.

أنا مش عايزة أتخيل إيه اللي كان ممكن يحصل لو حد لقاها.. أنا مش عايزة أتخيل-----



أحمد كان عصبي أوي لما قابلته النهارده في النادي.. كان متخاف مع علي، اللي بيلعب جيتار معاه في الـ(Band).. قال لي إن علي، بالرغم من إنه صاحبه من حضانة، ساعات يبقى أنا بي وغلس أوي، وإنه دائماً عايز يمشي الـ(Band) كلها على مزاجه.. النهارده الخناقة كانت شديدة أوي وعلي قرر إنه يسبب الفرقة.. أنا حاولت أهدي أحمد وأقول له إن علي أكيد جيهدي وحيغير رأييه، وإنه مش لازم يضايق نفسه بالشكل ده.. بص لي وضحك، وقال لي إن أنا فعلاً شبه نادبة لطفني، (ممثلتي المفضلة وقديوتي في التمثيل زي ما هو عارف)، وأنا طبعاً ضحكت، وقلت له إن بالرغم من إن أنا شعري إسود وبشرتي حمرية، حافوتها.



النهارده كان عيد ميلادي.. بقى عندي ١٧ سنة.. قابلت كل أصحابي في الكافيه وفي النادي.. كلهم جابولي هدايا تحفة.. مريم جابتلي حزمة سواريه (مش جلد طبيعي طبعاً) تحفة.. نادين جابتلي CD (زي ما هي وصفته) فيه "أحدث الأغاني الهابطة"، وباكينام جابتلي (Body) أنا وهي شُفناه من أسبوع في بوتيك في المعادي، وأنا كنت عايزاه بس كنت وقتها مفلسه، بس هي طبعاً افكرت واشترته ليا.. باكينام دي عظيمة!

أحمد جابلي سلسلة فضة على شكل ملاك صغير ماسك وردة.. هو اللي رسم التصميم وإدّاه لبتاع الفضة علشان يعمل.. أجمل هدية أخذتها في حياتي.. بعد كده أعدنا في النادي واتفرّجنا على "النظارة السوداء" على الـ (Laptop) بتاعه.. أنا مش عارفة هو ازاي عرف يجيبه، ويحطه على الـ (Laptop)، بس ده أحمد، كله مفاجآت، ويمكن يعمل أي حاجة علشان يبسطني.. أنا برضو ممكن أعمل أي حاجة علشان.



أنا متهيألي إن ده أبرد شتاء في تاريخ مصر.. حاجة بشعة،  
 أنا لابسة بتاع عشر طبقات صوف فوق بعض، وراقدة في  
 السرير تحت البطانية، وبرضو حاسة بالبرد.. أنا باحاول أذاكر،  
 بس البرد.. مش بس البرد.. أحمد.. كل يوم باحبه أكثر، كل  
 يوم بأفكر فيه أكثر.. أنا مش عارفة إيه اللي حيحصل بعد ما  
 أخلص مدرسة، مش قادرة أتخيل حاروح فين ولا حاعمل  
 إيه.. أنا مامتي عارفة إن أنا نفسي أطلع ممثلة، بس هي بتمثل  
 إن ده كلام هزار، وإن أنا خلاص "كبرت وعقلت".. بابا طبعاً  
 عمره ما سمع القصة دي أصلاً، وغالباً عمره ما حيسمعه.. لو  
 عرف ممكن يحبسني في البيت لغاية لما أموت.. أنا عارفة إن هو  
 عايزني أدخل تجارة أو هندسة وأبقى بنت محترمة ومتعلمة..  
 ليه؟ علشان يجي شاب محترم ومتعلم ويخطبني من أهلي  
 ونتجوز ونعيش في سعادة للأبد.. أنا طباحة أمه وهو رجل  
 البيت اللي ما بيغلطش.. أنا عارفة إن هو ده اللي بابا عايزه  
 ليا.. أنا مش عارفة حاعمل إيه، بس أنا حاموت قبل ما أبقى  
 طباحة حد!



٢٠ ديسمبر

امتحانات نص السنة.. كابوس لازم يعدّي.. ملل  
مووووووووووت.

مش عارفة أقابل أحمد خالص، باكلمه على التليفون  
بالعافية.. أنا مش عارفة كنت حاعمل إيه من غير الموبايل..  
هو فعلاً لازم يبقى في يد الجميع!



## ٥ يناير

أجازة نص السنة.. أنا بأقضيها لوحدي لأن أحمد سافر مع أهله للعين السخنة.. هو بيكلمني كل يوم، ويقول إن هو زهقان من غيري، لكن أنا عارفة إنه مبسوط؛ لأنه خد معاه الكيبورد (Keyboard) بتاعه، وده معناه إن هو حياّلف موسيقى وهو هناك.. أنا عارفة إنه بيحب يألّف وهو بعيد عن الدوشة، وبالذات لو هو لوحده.. أنا الأول كنت باغير! باغير من حبه الرهيب للفن والموسيقى، بس بعد كده اكتشفت إن ده جزء منه ومن شخصيته، شخصية الإنسان اللي أنا باحبه.. فتقبلت الجزء ده برضو.. هو فنان ولازم يعمل اللي هو عايز يعمل عشان يبقى سعيد.. طول ما هو مبسوط أنا مبسطة.. أنا نفسي أعوم معاه في البحر وأشوفه في مايوه، وأوريه جسمي في مايوه.. أنا مش عارفة أنا حاتكسّف منه ولّا لأ.. وأنا لابسة مايوه غالبًا لأ، بس من غير؟! هل ممكن أقدر أخليه يشوفني عريانة؟! يشوف الوحمة اللي على ضهري، وجرح عملية الأعور اللي في بطني؟ هل حيفتكر إن صدري في الحقيقة أصغر من ما كان هو متخيل؟ هل حتفرق معاه؟ أنا برضو نفسي أشوف جسمه. بالرغم من إنه رفيع (أوي)، بس أنا عارفة إني حاحب كل حنة من جسمه.. هل هو حيتكسّف مني؟



أنا نفسي أكون معاه دلوقي، نفسي أتكلم معاه وأحضنه  
وأبوسه وأقضي معاه الأجازة.. أنا مش عارفة حاستحمل  
الأجازة دي كلها ازاي من غيره.



أنا بقي لي أكثر من شهر ما كتبتش حاجة؛ لأني كنت مشغولة أوي.. أنا مش عارفة أنا ليه اتعودت إني أكتب كتير كده في النوتة دي.. أنا عمري ما كنت أتخيل إني حابقي من الناس اللي بيكتبوا أفكارهم في نوتة ويبخبوها من الناس كلها.. بس أنا بقيت باحب أكتب أفكاري. الكتابة بتريحني وبتخليني أعرف أفضي دماغي وأفكر بتركيز أكثر.. الأسبوعين اللي فاتوا دول كانوا جنان رسمي.. ما بين النتيجة وأصحابي وأحمد وأهلي، ما كانش عندي ثانية أعمل أي حاجة ثانية.. مش عارفة ليه، بس دائماً النص الثاني من السنة بيتحرك أسرع من النص الأولاني.. حاجة من الحاجات الغريبة اللي عمري ما فهمتها.. ممكن يكون قيوّات طبعاً، بس من وأنا صغيرة وأنا دائماً باحس بكده، كأن الكرة الأرضية بتلف أسرع.. أنا فاكرة لما مصر حصل فيها الزلزال الكبير أوي بتاع أكتوبر، أنا كنت في ابتدائي.. يومها لما كنت في المدرسة بالعب مع أصحابي في الجنة، بصيت على السما وتخيلت إن السحاب بيتحرك بسرعة جدّاً، بسرعة مخيفة.. أنا فاكرة إحساسي وقتها والرعب اللي أنا حسيت بيه.. لما روّحت البيت، ماما كانت محضّرة لي الغداء على الترابيزة زي كل يوم، ولما جيت أمد إيدي للطبق،



ابتدا يرقُص ويتَهزّز ووقع على الأرض واتكسر.. وقتها حسّيت  
إن الدنيا كلها بتتكسر، إن الأرض اللي تحتي اتحوّلت  
لصلصال.. بعد ما نزلنا من العمارة والزلازل وقف، بصيت  
للسما وشوفت إن السحاب بيتحرك بالراحة مش بسرعة زي  
ما شوفته وأنا في المدرسة.

ماما بتنادي عليّا.. أنا لازم أخجي...



يوم زفّت.. أنا حاسة إني مش عارفة أفكر ولا أتكلم.. ماما أعدت تسألني أنا ليه عينيا حمرا.. ما قدرتش أقولها إني كنت باعيط، بس هي فهمت طبعا.. أعدت تسألني عن اللي مضايقتني، وتقول لي إني ممكن أقول لها أي حاجة، ووقتها كنت على وشك إني أقول لها عن أحمد، بس لحقت نفسي واخترعت قصة هيلة عني أنا ومرم وإن إحنا اتخانقنا.. بعد شوية سابتني لوحدي.

النهارده أنا وأحمد اتخانقنا لأول مرة.. هو كان عصبي من أول ما جه، ولما سألته إيه اللي مضايقه، ما رضيش يقول لي.. قلت له إن أنا عايزة أساعد، وإنه عارف إن هو ممكن يقول لي أي حاجة مضايقه.. زعق وقال إن هو مش عايز يتكلم.. أنا عيطت وسبته ومشيت، فجري ورايا وحاول يصالحني، بس أنا كنت فعلا زعلانة.. هو عمره ما زعق قيا قبل كده، وعمره ما شوفته بالمنظر ده. قال لي إن هو أعصابه تعبانه، وإن هو آسف.. بس أنا حسيت إن في حاجة غلط، إن في حاجة بشعة هو محييا عني.. أعدنا مع بعض شوية، بس برضو ما قاليش إيه اللي مضايقه.. أنا قلقانة.



امبارح بالليل بعد ما اتخانقنا، أحمد كلمني وقال لي إيه اللي مضايقه.. هو قلقان من اللي حيحصل بعد ما حنخلص مدرسة؛ لأنه مش عارف هو حيروح فين، وأنا حاروح فين.. هو كمان طريقه صعب؛ لأنه فنان ومش عارف حيدرس فين بالظبط، وبيقول إيه لأهله لما الوقت ييجي إنه يختار جامعة.. هو حاسس إن الكونسيرفيتوار ما يناسبهوش.. هو مختار ومتضايق.. وطبعاً هو قلقان علينا، على علاقتنا.. هو بيفكر زي ما أنا بافكر.. إيه اللي حيحصل لما حندخل جامعة؟ علاقتنا حتتغير؟ حنعرف نشوف بعض زي الأول ولا لأ؟ أنا متأكدة إن إحنا لو حاولنا حنقدر نخلي كل حاجة زي ما هي.. بس أنا برضو قلقانة وخايفة.. أنا مش عارفة أنا رايحة فين وحابقي إيه.. أنا عمري ما خفت من حاجة في حياتي بالشكل ده.. أنا حاسة إن كل حاجة برأ إيدي، وإني مش فاهمة ولا عارفة حاجة عن اللي حيحصل بكره.



الأيام بتعدّي، وأنا وأحمد بنتقابل وبننيسط.. أنا وهو بنحب بعض للدرجة إن إحنا ساعات مش بنحتاج نتكلم خالص طالما إن إحنا قرييين من بعض، جسمنا واحد. أنا ما كنتش أتحيل إن في خلال سنة واحدة حياتي ممكن تتغير بالشكل ده.. السنة اللي فاتت كنت بنت عندي ١٦ سنة، عمري ما صاحبت ولا عرفت ولد.. حياتي كلها كانت أهلي وأصحابي والمدرسة وفريق السباحة والمذاكرة. دلوقتي أنا فاضللي أساييع وأخلص مدرسة، قابلت ولد وحييته، لأول مرة في حياتي ابتديت أفكر في إني فعلاً أبقى ممثلة.. أنا آخر مرة مثلت كان في ابتدائي في مسرحية مع المدرسة.. سندريلا.. أنا لعبت دور واحدة من بنات العم الشريرين.. أنا امبارح طلعت ألبوم صوري وأنا صغيرة، وشفت صوري وأنا على المسرح.. أنا كنت قصيرة جدًا ونطقي ملخبط، فأكيد كنت باضحك أكثر ما كنت باخوف.. أنا كان بقي لي سنين ما فكرتش في المسرحية دي.. بس دلوقتي لما بافكرها بافكر إحساسي وأنا على خشبة المسرح، والأضواء فوق راسي، والناس بتتفرج عليا بفستاني المنفوش ومكياج المربع.. بافكر خوفي وفرحتي لما بدأت أتكلم.. وأكثر حاجة فاكرها، التسقيف بتاع الجمهور.. أنا



صحيح ما كانش عندي غير سبع سنين، بس وقتها أنا عرفت  
إن التمثيل ده حاجة جميلة وبتسعدن.. بسبب ظروف وأهلي  
والمدرسة والقرف بتاع كل حاجة، أنا نسيت الإحساس ده..  
بس أحمد فكري، مش عارفة ازاي، بس إحساسي وأنا معاه  
قريب من الإحساس اللي حسيت بيه وأنا على المسرح وقتها.  
الإحساس إن أنا سعيدة، باعمل حاجة صح، حاجة جميلة،  
نعمة. أنا لازم أشوف طريقة أحس بيها بنفس الإحساس ده  
تاني. أنا لازم أحاول أقول لأهلي.



أنا بقى لي أسبوع باحاول ألاقى طريقة أقول بيها لأهلي إن أنا عايزة أبقى ممثلة. بس أنا مش عارفة. كل ما أحاول، نَفَسِي بيروح وباخاف وما باقولش حاجة. أحمد متضايق مني ويقول لي إن أنا لازم ماخافش من حد وأقول الحقيقة. هو قال لأهله خلاص وبالرغم من إهم ما عجبهمش الكلام (هما كانوا فاكرين موضوع الموسيقى ده هواية)، لكنهم بيفكروا في اللي هو قاله وفي الأغلب حيحاولوا يساعده. أنا طبعاً موقفتي مختلف لأني بنت. بالنسبة لأهلي ولأغلب الأهالي في مصر، إن بنت تطلع ممثلة.. دي تبقى فضيحة. كأن البنت بتقول إنها عايزة تبقى رقاصة رقص بلدي مثلاً. مامتي حتتهار بس مش حتزعل، وبابا حيقعد يزعل ويمكن حتى يحاول يجبسنني في البيت. أنا مش متأكدة من رد فعلهم طبعاً، بس ده تخيلي وأنا متهيألي إنه مش بعيد عن الحقيقة.

الأيام بتجري وأنا لازم آخذ قرار بسرعة.



٢٠ أبريل

الامتحانات قربت وابتدنا ندخل في أبشع أوقات. دروس  
خصوصية مش بتنتهي، مذاكرة هيستريا، وشرب قهوة بالتر.  
ربنا يستر والامتحانات تعدي على خير. أنا عايزة أخلص.  
الثانوية العامة دي فعلاً كابوس.

لسه ما قلتش لأهلي حاجة عن حكاية التمثيل دي. قريب.

٢٥ مايو

أخيراً خلصت امتحانات! أسعد يوم في حياتي؟ حرية للأبد  
من السجن اللي بيسموه المدرسة؟ بس لسه في السجن الثاني  
اللي بيسموه الجامعة. بس أكيد الجامعة حتبقي أحسن. ماما  
دائماً بتقول لي إن الجامعة فيها حرية أكثر وجوها مختلف. أنا  
مستني أهو علشان أشوف الحقيقة بنفسي. أنا برضو مرعوبة.  
قريب النتيجة حتطلع وبعد كده التنسيق، فلانم أجهز نفسي  
وأقرر حاقول إيه لأهلي. مافيش وقت خلاص. يا قاتل يا  
مقتول. المهم إن الأجازة بدأت وأنا حاقدر أشوف أحمد زي ما  
أنا عايزة. أخيراً، الحرية!



أحمد كلمني النهارده وقال لي إنه عايز يشوفني ضروري.  
هو صوته ما كانش عصبي أو قلقان، بس حسّسني إنه مخي  
حاجة أو بيحاول إنه يجهزني لصدمة. مش عارفة أوصف  
إحساسي ازاي، بس اللي أنا متأكدة منه إن أنا خايفة أقابله،  
حاسة إن النهارده كل حاجة حتنغير. أنا مش عارفة أروح ولا  
لا. أنا خايفة أوي. مش عارفة أعمل إيه.



أنا مش عارفة أكتب إيه. أنا حاسة إن مش قادرة أفكر ولا أتكلم ولا حتى أعيط أكثر من كده. أنا حاسة إن جسمي كله بيوجعني، إن راسي ثقيلة حتنفجر من كثر التفكير والضغط. مش عارفة أروح فين من أهلي ومن بيتي ومن البلد المقررة الزبالة دي. أنا حاسة إنني ممكن...

أنا عمالة آخذ في دواء أدبتهولي مريم، المفروض إنه قوي. أنا مش حاسة بمفعوله أوي، بس على الأقل الرعشة اللي في جسمي وقفت وإيدي ثبتت كفاية علشان أقدر أكتب. أنا قابلت أحمد امبارح. هو قال لي الحقيقة. هو فكر كثير في مستقبله وعارف إن طريقه مش في مصر. هو فنان حقيقي، بيعشق الموسيقى ومصر مافيهاش مكان للفنانين الحقيقيين، بالذات اللي معندهم مش وسطة أو معارف. هو عنده قرايب في أمريكا وهما جابوله (Green Card) السنة اللي فاتت، فهو يقدر يعيش هناك. أهله نصحوه إنه يجرب حظه هناك، فقدم في جامعة اسمها ( Berkley School Of Music) واتقبل. هو ما قاليش إنه قدّم لأنه مكانش متخيل إنه حيتقبل في واحدة من أحسن جامعات الموسيقى في العالم. بس أحمد دائماً يقلل من قدر نفسه، لأنه مش عارف أد إيه هو



إنسان مميز ومختلف. دي من أكثر الحاجات اللي أنا باحيتها فيه. هو طبعا حيسافر أمريكا وحيحاول يبدأ حياته هناك. هو حيسافر في يوليو. هو بيقول إنه حيفضل يحبني للأبد وإن إحنا لازم نحاول نتجوز في المستقبل. بس، ما بينا وما بين نفسنا، إحنا الاتنين عارفين إن خلاص كل حاجة انتهت. هو في بلد وأنا في بلد، هو حيقى له حياة وأنا حيقى ليا.. إيه؟ ماعرفش. حياتنا مع بعض انتهت. أنا انتهيت. أنا حاسة إن حياتي مالهش معنى. حاسة إني لو بطلت كتابة حيفمى عليا ومش حاصحى تاني أبدا. يا ريت ده يحصل.



قابلت أحمد النهارده. كل حاجة اتغيرت. أنا باقى مبسوطه وأنا معاه، بس على طول حاسة إن الوقت بييجري، كأن إحنا ورائنا حاجة لازم نعملها وخايفين ما نلحقش. ما بقيناش قادرين ننسب زي الأول، بقى في ما بينا (Tension) عمرها ما كانت موجودة قبل كده. وبقى في حاجة تانية كمان عمري ما كنت أتخيل إنها ممكن تبقى موجودة ما بينا: غضب وعدم ثقة من ناحيتي. هو حسّ بيها الأول، بس أنا دلوقتي خدت بالي منها. أنا كنت بانكر الإحساس ده، بس أنا دلوقتي عارفة إن أنا زعلانة منه بطريقة عمره ما حيقدر يفهمها أو يتخيلها. هو خائني، هو حيسيبي وعشي. حيسيبي لوحدي، حيسيبي قبل ما حياتنا بتبدي، حيسيبي نص إنسانة، حيسيبي بنت مالهش غرض إنها تعيش غير إنها تعيش من غير غرض. هو حسّسي بحاجات ما كنتش أعرف إنها موجودة في الدنيا ودلوقتي حيسيبي وأنا لسه بابتدي أستمتع بحياتي معاه. أنا حاسة إن هو مش متدمر زي ما أنا متدمرة. أنا حاسة إن هو زعلان بس إنه حيقدر يكمل حياته. هل الرجالة فعلاً قاسيين وقلوبهم حجر زي ما ماما ساعات بتقول؟ هل ممكن ينسوا بسرعة للدرجة دي ويكملوا حياتهم وهما سايين وراهم بنات



قلوبهم متقطعة وحياتهم متدمرة؟ أنا عارفة إن أحمد مش كده،  
إنه طيب وحساس وجميل. بس دلوقتي ابتديت أشك إنه يمكن  
يكون فيه قوة وقسوة بجانب الحاجات الثانية. بس هو لازم  
يشوف مستقبله. أنا عارفة إنه لو قعد في البلد الفقراة دي  
حيثدفن. هل أنا عايزاه يقعد معايا حتى لو ده حيدمر مستقبله؟  
ساعات بافكر كده، إن طظ في مستقبله، إن أنا عايزاه جنني،  
عايزة أفضل أسمع صوته طول عمري وأحس بيه وأتكلم معاه  
وأحس بحرارة جسمه وأمس شفافته وشعره وأتخاّن معاه  
ويحضني وأحضنه ويص في وشي و يحسّسني إن أنا أهم واحدة  
في الدنيا وإن أنا إنسانة كويسة وليّا غرض في الدنيا وإن أنا  
باحب وحد بيحيي. بس طبعًا أنا عارفة إن ده ظلم وإن هو ما  
يستاهلش ده. هو يستاهل إنه يبقى أحسن واحد في الدنيا، إنه  
يقي سعيد، إنه يعيش حياته وهو مبسوط. أنا باحبه، باحبه  
أكثر من أي حاجة وأي حد. أنا عايزاه يعيش سعيد. بس  
أنا...



#### ٤ يوليو

أحمد سافر امبارح. أنا قضيت معاه أغلب اليوم. هو كان متوتر ومتخلبط ومستعجل. أنا حاولت أهديه ومثلت إن أنا كويسة، إني قلتي مش بيوجعني. مكانش فيه حاجة تتقال، مكانش في وداع في المطار أو جري ورا الطائرة زي الأفلام. كان في أعدة وكلام وضحك وتليفونه الموبايل اللي ما بطلش رن. معارف وقرايب وأصحاب بيودعوه. أنا حضنته آخر مرة وسبته ومشيت. الموضوع كان أسهل بكثير من ما أنا كنت فاكرة. دلوقتي أنا عارفة ليه. الوداع كان سهل لأني خلاص استسلمت، عارفة إن مافيش حاجة تتعمل، إن كل حاجة حتغير وإن أنا عمري ما خارج زي الأول. ابتداء من النهارده، أنا بقيت وحيدة، عادية، مش باحب حد ولا حد بيحبني.



أنا بقى لي زمن ما كتبش حاجة في النوتة دي. غالبًا  
 علشان كتابة أفكارى مابقتش مهمة أوي زي الأول. ما  
 عنديش حاجة أكتبها. أنا خلصت أول أسبوع لّي في الجامعة.  
 كان معقول، أحسن بكثير من ما أنا كنت متخيلة. أنا عارفة  
 إني محظوظة إني اتقبلت في تجارة إنجليزى في جامعة القاهرة.  
 كثير من أصحابي ما جابوش مجموع، بس أنا جيت. كانت  
 مفاجأة لّي قبل أي حد تاني. كل أصحابي يقولولي إن أنا  
 محظوظة. أنا كنت فاكرة إنها حتبقى جحيم، بس لغاية دلوقتي  
 أنا شايفة إنها محتملة. أنا عارفة إني حاتعود عليها أكثر لما الترم  
 يعدي عليه شوية وقت. أنا عندي جمعة وسبت أجازة زي أيام  
 المدرسة. أنا ونادين ورميم وباكينام المفروض نتقابل في النادي  
 النهارده بالليل، بس أنا مش عارفة إذا كنت حاقدر ولا لا.  
 ساعات بقيت باحس إن النادي بيخنقني، إنه قديم وضملة. بس  
 أنا حافكر. أنا ماشوفتهم بقى لي أكثر من أسبوعين.



## ٤ أكتوبر

أنا اتعرفت على ناس جديدة كثير في الجامعة. كثير منهم ناس ظريفة ومتهيألي إن مع الوقت حاتعود عليهم أكثر. ماما بتقول لي إن أنا بقيت منطوية ومش زي زمان. بتقول إن أنا أيام ما كنت مع فريق السباحة كنت على طول باقابل أصحابي، وكانوا بيكلموني على التليفون كثير. دلوقتي كل حاجة اتغيرت. هي عندها حق. كل حاجة فعلاً اتغيرت لأن أنا اتغيرت.



النهارده فَوْتُ محاضرة (Basics of Accounting) مع الدكتور أيمن الشاذلي. هو دمه ثقيل وبيخنقني. وأنا أعدة في محاضراته باحس إن أنا زهقانة لدرجة إن أنا ممكن أصرخ. هو صوته عالي ورنان وسخيف ومش بافهم منه أي حاجة. أنا حاولت أحضر المحاضرة، بس أول لما قربت من القاعة وسمعت صوته، حسيت إنني لا يمكن حاقدر أقعد ساعتين باسمعه. طلعت أعدت برّا في الجنية. الغريب إن المحاضرة بتبدأ الساعة ١٢ وبتخلص ٢. أنا لما سبت المحاضرة وروحت أقعد في الجنية فجأة لقيت الساعة ٣. كل أصحابي كانوا مشيوا، ولما بصيت حواليا لقيت نفسي أعدة لوحدي بس مش في الجنية، في قاعة ثانية، فاضية، مافيهاش حد. أنا حاولت أفكر أنا جيت هنا ازاي وإمتي، بس ما قدرتش. مش عارفة ده حصل ازاي. قمت بسرعة وأخذت تاكسي على البيت. لما روّحت أعدت على المكتب، ومن وقتها عمّالة أحاول أفكر، باحاول أفهم إيه اللي حصل. بس مش قادرة، في ثلاث ساعة طاروا مني، اتبخروا. مش فاكرة ولا دقيقة منهم. أنا خايفه.



أنا حكيت لباكينام اللي حصل ليّا امبارح وهي استغربت أوي. أول حاجة سألتها إذا كنت تَمُت على نفسي واناكُدت إن محدّش عمل فيّا حاجة. أنا قلت لها إن دي أول حاجة أنا عملتها لما رجعت البيت وإن الحمد لله اتأكُدت إن أنا ما اتأذتش. بعد كده سألتني إذا كنت حسيت وقتها إني دايجة أو ريقني ناشف أو نَفَسِي ضيق. قلتها إن أنا ريقني كان ناشف كأني ما شربتش مياه من ساعات، بس بجانب كده ما حسّتش بأي حاجة غريبة أو إني دايجة أو هفتانة. هي كانت خايضة إن حد إدّاني محدّرات بس أنا كنت متأكدة إن مش ده اللي حصل. هي قالت لي إن التفسير الوحيد إن أنا أغمى عليّا لأني سبب وأنا هناك وإن محدّش خد باله. أنا قلت لها إن ده صعب أوي. ازاي أغمى عليّا في قاعة مليانة طلبة ومحدّش شافني ولا ساعدني لمدة ثلاث ساعات، بجانب إن أنا مش عارفة إيه اللي وداني القاعة دي من أساسه. أنا ما كانش عندي أي محاضرات هناك أصلًا. هي ما عرفتش ترد عليّا وقالت لي إن في الحالة دي أنا لازم أروح لدكتور وأشيّك على نفسي. فسألتها دكتور إيه بالظبط، فقالت لي باطني طبعًا. هو حيكشف عليّا وحيعرف لو في أي حاجة غلط. قلت لها إن أنا حاستني شوية ولو ده



حصل ثاني حاروح للدكتور. مافيش داعي أقلق أهلي على  
الفاضي. هي طبعاً ما عجبناش الكلام وقالت لي إن أنا  
المفروض أروح للدكتور فوراً. أقنعتها بالعافية إن كام يوم مش  
حيغرفوا وسبتها وهي فلقانة. أنا بافكر نفس تفكيرها. أنا  
برضو حساسة إن في حاجة غلط، بس مش عايزة أواجه المشكلة  
دي دلوقتي. عايزة أستنى شوية وأشوف إيه اللي يحصل.



بقى لي شهر في الجامعة دلوقتي. الوقت بييجري وكل حاجة بتتغير. إحساسي كطالبة في الجامعة مختلف عن ما أنا كنت متخيلة. كنت فاكرة إني حاحس بحرية كبيرة وجو مختلف تمامًا عن المدرسة وأصحاب جداد وأحس إني كبرت واتغيرت. في شوية من الحاجات دي اتحققت بس بشكل مختلف. أنا حاسة إني اتغيرت وكبرت بس مش بالطريقة اللي أنا كنت متخيلاها. ما كنتش عارفة إن الواحد لما بيكبر خياله بيضعف، نفسه لحاجات كثير بتروح وإحساسه بالإمكانيات تقريبًا بيختفي. وأنا صغيرة كنت بانخيل إن الدنيا كبيرة أوي لدرجة إن أنا كنت باخاف أفكر هي ممكن تكون كبيرة أد إيه، كنت باحس إن أنا ممكن أغرق أو أتوه في كبرها وإن الدنيا مش عبارة عن كرة زي ما الناس بتقول، لأ، كنت بانخيل إن الدنيا عبارة عن بحر كبير أوي، محيط، وإن أنا عايشة على جزيرة صغيرة وسطه. لو جريت بعيد شوية عن الشط، ممكن يسحبني التيار ويغرقني في وسط البحر اللي مالوش نهاية. ساعات كانت الفكرة بتجيلي في شكل كوابيس وساعات كانت بتيجي في شكل "أحلام يقظة" زي ما مدرسة الـ (Biology) كانت بتقولنا في أولى ثانوي لما حد منّا كان بيسرح وهي بتشرح



حاجة. لما كبرت شوية، الفكرة إن العالم كبير أوي كده بدأت تعجبي، تولع خيالي، تحسني بأن كل شيء ممكن. كان الإحساس ده بيثيرني ويخليني عايزة أسافر وأعمل مغامرات وأحب. دلوقتي أنا حاسة إن الدنيا صغيرة وفعلاً عبارة عن كوكب مدور ممكن تروح وتيجي لأي مكان فيه بسهولة. ما بقتش حاسة بإن الاحتمالات مالهش نهاية ولا إني عمري حاعمل مغامرات. أنا فاضللي شهر وبقى عندي ١٨ سنة. ورايا طن مذاكرة، بعد ما حاتخرج، أخري حاشتغل في بنك أو شركة اتصالات وأقابل واحد عادي حيقوللي إنه بيحبي وأنا حاقنع نفسي إن أنا باحبه وبعد كده نتجوز. بعد الجواز حيقوللي اتحجّي وغالبًا حixelيني أبطل شغل. لأ! إيه اللي أنا بافكر فيه ده. لأ طبعاً، أنا لا يمكن حاسم إن حياتي تترمي في الزبالة بالشكل ده. لأ. يا رب أرجوك ما تكونش دي حياتي.



النهارده قابلت باكي ونادين ومنى وحق مريم اللي إحنا كنا  
بدأنا نثريق عليها ونسميها "اللهو الخفي" لأنها ما بتظهرش  
خالص. أعدنا نخكي لبعض قصص كفاحنا في الجامعة. كل  
واحدة فينا عندها مغامرات تملأ مجلدات، بالرغم إن إحنا لسه  
حتى مخلصناش أول (Term).

نادين حكّت عن زميلها في الجامعة اللي معجب بيها. تاني  
يوم ليهم في الجامعة جالها وطلب يصاحبها خبط لرق من غير  
أهلاً ولا أزيك. من غير حتى ما يعرف اسمها. طبعاً قالت له  
لا، فابتدا يمشي وراها وهي مروحة بيتها، وتاني يوم الصبح  
لقيته مستنيها تحت بيتها. فضل يمشي وراها كل يوم لغاية لما  
واجهته وهددت إنها تبلغ البوليس، فضحك وقالها إن هو ما  
عملش حاجة وإن هو يمشي في شوارع الحكومة. تاني يوم  
مشي وراها برضو فبلغت البوليس. البوليس ما جاش. كلمت  
واحدة صاحبتنا اسمها نورا وقالت لها على القصة دي، فنورا  
قالت لأخوها "البلطجي"، فجمع شوية من أصحابه وقابلوا  
الولد بعد ما نادين خلصت الجامعة ومشى وراها. مسكوه  
وضربوه لغاية لما عيظ وطبعاً عمره ما مشى وراها تاني. هي  
متضايقه إن الموضوع وصل لكده، بس هي ما كانش عندها



حل ثاني. مني كان عندها قصة ثانية، مختلفة خالص. هي معجبة بواحد من الدكاترة بتوعها بتقول إن هو "حلم وانحقق" وإنا مستعدة تدفع أي حاجة علشان ليلة واحدة معاه. كلنا متنا على روحنا من الضحك وقلنا لها إنا بلا شك حتسقط في مادته. مريم قالت إنا للأسف ما عندهاش قصص مشوقة زي بقتنا، فنادين اتريقت عليها وقالت لها إن الجامعات الخاصة في كوكب ثاني. كلهم سألوني عن أخباري ووقتها فكرت إني أقول لهم على قصة الثلاث ساعات اللي هربوا مني، بس ما قدرتش، وباكينام بصت لي وفهمت أنا بافكر في إيه. بجانب كده كلنا انبسطنا ووعدنا بعض إن إحنا نحاول نتقابل كل أسبوع، بالرغم من إحنا عارفين إن ده غالباً مش حيحصل.



أنا لستُ صاحبة من النوم، الساعة أربعة الفجر. أنا عابرة  
أكتب اللي أنا حلمت بيه قبل ما أنسى. أنا حلمت إن أنا  
ماشية في شارع طويل شكله مألوف بالنسبة لي، الدنيا ليل،  
مافيش مخلوق في الشارع. مشيت لآخره وحسيت إن أنا رايحة  
مكان قديم أعرفه من وأنا صغيرة. لما وصلت لآخر الشارع،  
الدنيا فجأة بقت ضهر ولقيت نفسي بانزل سلام وبادخل  
بدروم. البدروم كان منور بلمبة واحدة متعلقة في السقف.  
البدروم كان فاضي خالص مافيهوش أي حاجة. لما دخلت  
جواً أكثر شوية شوفت حد واقف مديني ضهره. قربت منه  
وحطيت إيدي على كتفه بس ما انحركش. وقفت قدامه  
وبصيت في وشه. طلعت مانيكان فترينة، صلعا، من غير  
باروكة ولا بسة سوتيان بس. بصيت تحت ولقيت إن فوق  
فخدها اليمين، جنب سرة البطن، في أثر جرح. عرفته على  
طول، كان نفس الجرح اللي عندي من عملية الأعور. هو هو،  
بالظبط، نفس الشكل ونفس الحجم. بصيت في وش المانيكان  
ولقيت عينيها البلاستيك مليانه دموع.



أنا النهارده فتحت مذكراتي وقريت اللي أنا كتبتة عن الحلم. أنا دلوقتي مش فاكرة أغلبه بس فاكرة الشارع اللي أنا شوفته في الحلم وحاسة إني فعلاً أعرفه، بس مش قادرة أفكر شوفته فين قبل كده. بقية الحلم مش قادرة أفهمه خالص. إيه معنى المانيكان والجرح المطابق للجرحي؟ وأنا ليه اهتميت إني أصحى من النوم وأكتب تفاصيل الحلم ده بالذات؟ ليه أنا كنت خايفة أنساه؟ أنا عمري ما كتبت أي تفاصيل أحلامي قبل كده. أنا أصلًا مش فاكرة آخر مرة حلمت. أنا بطبيعتي ما باحلمش كثير. متهيألي، مش متأكدة. أنا نفسي بس افكر شوفت الشارع ده فين قبل كده.



النهارده حصلت حاجة غريبة جداً، صدفة زي بتاعة الأفلام. وأنا خارجة من واحدة من محاضراتي لقيت بنت شكلها مألوف بالنسبة لي واقفة على السلم وبتضحكلي. بعد كده جات لي وقالت لي إن اسمها نيفين رستم. افكرتها على طول رغم إنني ما شوفتهاش من ست سنين، من أولى إعدادي. هي كانت صاحبي وقتها في المدرسة وبعد كده أهلها قرروا ينقلوا بلجيكا فسابت المدرسة وما شوفتهاش من وقتها. بس بالرغم من كده، افكرتها على طول أول لما قالت اسمها وأخذتها بالحضن. شكلها ما اتغيرش كثير، لسه قليلة وشعرها برضو لماه في ديل حصان. وشها مبتسم دائماً والأعدة معاها مريحة بطريقة غريبة كأنها أختي مش صاحبي. حاكتلي عن حياتها في بلجيكا وعن المدرسة هناك وقالت لي إنها كانت مبسوطة جداً وكان عندها أصحاب كثير. بس جلدتها ماتت في سبتمبر وأهلها قرروا إنهم يجوا هنا علشان الجنازة، ولما جم مصر قرروا إنهم يقعدوا شوية لأن باباها كان بيفكر يفتح فرع من شركته في مصر وشاف إن وجوده في مصر دلوقتي فرصة كويسة. نيفين ما كانتش عارفة تعمل إيه فقررت إنها تدخل الجامعة الأمريكية في مصر لمدة سنتين وبعد كده تكمل تاني في



بلجيكا. هي كانت في جامعة القاهرة النهارده علشان تقابل بنت عمها اللي كانت المفروض تفرجها على الجامعة وبعد كده تفسحها شوية في وسط البلد. أنا تطوعت إني أفسحها بنفسي وإها تتغدى معايا في البيت لأن أنا كنت عارفة إن ماما حتفرح جدًا لما تشوفها، هي طول عمرها كانت بتحب نيفين أوي وزعلت جدًا لما هاجرت لبلجيكا. نيفين قالت لي إها ما تقدرش وإها لازم تخرج مع بنت عمها النهارده، بس إدّيتني غمرة تليفونها وقالت لي إها لسه معاها غمرة تليفوني بس هي ما كانتش متأكدة إذا كانت اتغيرت ولا لا، فقلت لها إن غمرتي زي ما هي. وعدتني إها حتكلمني بالليل وبعد كده اتمشيت معاها لغاية الكافيتيريا ولما لقت بنت عمها سابتي ومشيت.

صدفة غريبة جدًا. نيفين رستم! آخر واحدة في الدنيا كنت أتخيل إني أقابلها دلوقتي. حاجة غريبة إن الواحد ممكن ينسى حد كان قريب منه أوي لمجرد إنه ما بقاش بيشوفه. أنا مش فاكرة إمتى آخر مرة فكرت في نيفين. غالبًا في تانية ثانوي. حاجة محزنة إن واحدة من أقرب الأصحاب ليًا تختفي خالص من ذاكرتي أول لما تسافر. هل فعلًا الواحد ممكن ينسى حد بيعبه بالسهولة دي؟ يمكن.

\*\*\*\*



نيفين فعلاً كلمتني بالليل ولما ماما ردت عليها طارت من الفرحة وما كانتش مصدقة نفسها. لما دخلت لي الأوضة علشان تقول لي، كان صوتها عالي وعازبة تفاجئني، فضحكت وقلت لها إن أنا قابلت نيفين النهارده في الجامعة، فهديت شوية واديتني التليفون وهي مبتسمة ابتسامة جميلة (ما باشوفهاش كفاية على وشها). نيفين قالت لي إن مصر اتغيرت أوي وإن النهارده كانت أول مرة تاخذ الـ (Grand tour) لمصر من يوم ما جات، لأن بيتها الجديد في ٦ أكتوبر وهي من يوم ما جات وهي ما بتروحش حطة غير (Malls). النهارده بنت عمها خدتنا خان الخليلي ووسط البلد وحتى عدلوا على الأهرامات بسرعة. هي كان صوتها مقتول وهي بتكلمني وأنا ما كنتش مستغربة بعد كل اللي هي عملته النهارده. قالت لي إن هي لاحظت حاجتين في مصر جداد عليها. أول حاجة إن مصر بقت مزعجة أوي وإن الناس كلها بقي صوتهم عالي. هي بتقول إن ده غالباً لأن مصر بقت زحمة أكثر من الأول بكثير. ثاني حاجة هي لاحظتها هي عدد الستات المحجبة والرجال الملتهجين. قالت إن هي لما كانت في مصر من ست سنين الوضع كان مختلف. قلت لها إن فعلاً في حاجات كتير في مصر اتغيرت وإن هي مش بيتهيأ لها. قالت لي إنها نفسها تقابل كل أصحابنا من المدرسة وإن هي غالباً مش حتقعد في مصر غير



سنة كمان، وإلها عايزة تستفيد من الوقت على قد ما تقدر.  
قلت لها إن نادين وباكي ومرم ونورا حيفرحوا جدًا لما يعرفوا  
إلها في مصر وإلها ممكن تقابلهم يوم الخميس الجاي.. بعد كده  
سألتني عن أخباري وحكيت لها عن كل حاجة. أنا استغربت  
نفسى لما بدأت أحكيلها عن أحمد وعن إن أنا كنت عايزة  
أبقى ممثلة وعن زهقي من الجامعة، حاجات أنا ما اتكلمتش  
فيها مع حد، (ولا حتى باكي) من فترة طويلة أوي. أنا  
حسّيت إن أنا صعبت أوي على نيفين وكنت عارفة إلها  
الوحيدة اللي ممكن تسمع كل حاجة من غير ما توعظ أو تقول  
لحد. هي طول عمرها طيبة وجدعة ولما بدأت أتكلم معاها  
النهاردة على التلفون، حسّيت بالأنا كنت باحس بيه وأنا  
صغيرة.. مطمّنة.



كلنا اتقابلنا في النادي (أول مرة أدخله من فترة طويلة)، ونادين وباكي ونورا (مرم ما ظهرتش) فرحوا جدًّا بنيفين وهروها أسئلة. هي بطبيعتها هادية وخجولة شوية وكوفها محور الاهتمام ضايقها شوية، بس هي ردت على كل الأسئلة، وحكت لهم عن وقتها في بلجيكا، وعن مدرستها. شوية بشوية الحوار راح ناحية الصحوية، وهي ما اتكسفتش وقالت لهم إنها صاحبت أكثر من مرة، وإنها حبت واحد، بس للأسف العلاقة انتهت بشكل سيئ (معلومة جديدة عليًا). قالت إنه كان بلجيكي مش مصري وما رضيتش توضح أكثر من كده وهما سابوا الموضوع في حاله. الليلة طارت وفجأة لقينا الساعة عشرة. كلنا كان لازم نروح (أنا بالذات لأن بابا ممكن يقلب الدنيا لو اتأخرت عن عشرة ونص). قبل ما أمشي، نيفين اتفقت معايا إني أجيلها وأتغدى معاها يوم السبت، بعد بكرة، في بيتها في ٦ أكتوبر. قلت لها إنه صعب إن أنا أروح أكتوبر لأنني ماعيش عربية (ولا رخصة)، بس هي قالت لي إنها حبتعت سواق مامتها ياخدني وإن أنا كده ماعنديش عذر، فوافقت.



يوم حافل جدًا. النهارده روجت أتغدى عند نيفين. هي ساكنة في مجمع في أكتوبر اسمه الحصن، مجمع كبير وتصميمه شبه الضواحي الأمريكي اللي شوفتها في الأفلام والحلقات. مختلف شوية عليًا، بس بعد شوية حسيت إنه مكان مريح وجوه مميز. أهلها رحبوا بيًا جدًا ومامتها أخذتني بالحضن لما شافتني. طنط هناء شكلها ما اتغيرش خالص، لسه جميلة وشكلها طيب وابتسامتها بتنور أي مكان. نيفين شبه مامتها أكثر من بابها بكثير، حاجة ما أخذتش بالي منها أو يمكن ما فكرتش فيها أوي قبل النهارده. الغداء كان معزوم فيه ناس كثير. كان في عمها وبنت عمها وحالتها وجوز حالتها. بجانب العائلة، كان في حيران نيفين اللي ساكنين في الفيلا اللي جنبهم. عائلة الشرفاوي. الأب و الأم و بنتهم ليلي. بعد الغداء كله أعدد مع بعضه، بس أنا و نيفين و سالي (بنت عمها) و ليلي أخذنا جنب. نيفين عرّفتنا على بعض وبدأنا نتكلم. أنا و ليلي أتكلّمنا مع بعض كثير، أنا متهايلي إن أنا اتكلّمت معاها أكثر من الباقيين. هي شخصية غريبة. هي طلعت إها معايا في جامعة القاهرة بس قسم آداب إنجليزي، فطبعًا عمرنا ما اتقابلنا قبل كده وسط آلاف الطلبة. هي شكلها جميل جدًا، شعرها



بني فاتح وعينيها فاتحة قوي، عسلي. أنا متأكدة إنها تعاني من معاكسات في الجامعة بتاعتنا، في بنات في الجامعة أوحش منها بكثير ومتبهدين معاكسات. ربنا معاها. هي عندها ثقة في نفسها بس مش مغرورة. كذا مرة كانت عايزة تطلع سيجارة بس كانت بتغير رأيها كل ما تفتكر إنها مع أهلها. أديتني الإحساس إنها شقية، مش على بعضها، بس الغريب إن أنا حسيت إنها طيبة، مش رزلة أو معقدة بالرغم من جمالها وشقاوتها. رغبة جدًا! بس برضو بتسمع. بان إن محدش من الأعديين بجرأها لما حككت عن واحد هي معجبة بيه، وهي عارفة إن أهلها وأصحابهم ممكن يسمعوها. هي كانت موطية صوحتها بس أنا كنت لا يمكن أخاطر زيتها، بالذات بعد ما سمعتها بتوصف الرجل اللي هي معجبة بيه! هي بتقول إن اسمه كمال رفعت، ساكن معاها في المجمع. نيفين قالت إنها سمعت اسمه بس عمرها ما شافته، وليلى قالت لها إنها لو كانت شافته ما كانت حتنساه. قالت إنه جذاب طحن وغني جدًا ومقطع السمكة وديلها. بتقول إنه معروف عنه إنه دمر قلوب بنات كثير وأغلب الوقت بيصاحب بنات أصغر منه (هي قالت إنه في الثلاثينات). قالت إن سمعته في السرير خرافية، ووقتها كلنا وشنا احمرّ وخفنا إن الأهالي يسمعوا، وسالي بالذات شكلها اتعصب وبعدت عنا كأنها مكسوفة أو مش عاجبها الكلام.



ليلي ما فرقت معاها وكملت. هي قالت إنها بترسم عليه من فترة بس هو مطمئنها، غالبًا لأنه حاسس إنها صغيرة أوي عليه، بس هي مقتنعة إنه لو إذاها فرصة حبيبٍ له إنها أحسن من ستات ضعف عمرها، من نواحي كثيرة. بعد ما قالت كده ضحكت وكلنا ما قدرناش نمسك نفسنا وضحكنا. بس أنا حسيت إنها ما بتهدرش وإنها فعلا مصممة إنها تعمل علاقة معاها. هي خدت غمري وأنا خدت غمرها (أنا اتكسفت ما أدبهاش غمري بالرغم من إني ما أعرفهاش خالص). بعد ما ليلي مشيت مع أهلها، سالي قالت لنيفين إنها مستغربة إن ليلي بنت مدحت الشرقاوي ومراته لأنهم ناس محترمين جدًا، بس نيفين قالت لها إن ليلي شخصيتها قوية ودمها خفيف وإنها ما تقصدش حاجة بكلامها، بس كان من الواضح إن سالي تفضل إنها ما تشوفش ليلي تاني. بعد كده نيفين قالت لي إنها ماتعرفش ليلي كويس بس هي حاسة إنها بنت ظريفة، يمكن منطلقة شوية بالنسبة لمصر، بس إنها طيبة. قلت لها إن أنا رأيي كده برضو. وبعد كده قالت لي إنها سمعت كثير عن كمال رفعت ده وإنه فعلاً سمعته مش كويسة وإنه اتقبض عليه كذا مرة، بس أبوه المليونير بيطلعه دائماً وبيغطي على فضايحه. المفروض إنه فعلاً جذاب جدًا وإنه "زير نساء". أنا بعد الكلام ده كله حسيت إنه أسطورة أكثر ما هو بني آدم وابتديت أزهدق



من سيرته. بعد كده روّحت البيت وبعد ما دخلت أوضعتي  
افتكرت حاجة، إن أنا كنت ناوية أقول لنيفين على قصة  
الثلاث الساعات اللي أنا مش قادرة أفتكرهم واللي نفسي  
أعرف حصل فيهم إيه، بس بسبب كل المعازم والدوشة نسيت  
أقول لها. أنا مش عارفة أنا ليه عايزة أقول لها. أنا أشك إنها  
حتقدر تساعدني أو تفهم اللي حصل، بس أنا حاسة إني لازم  
أقول لحد تاني أنا باثق فيه، وبجانب باكينام أنا ما عنديش حد  
غير نيفين.



بداية أسبوع جديد في الجامعة. أنا ابتديت أعود عليها وعلى الكورسات، بس مش قادرة أتخيل نفسي بأدرس المواد دي أربع سنين. يمكن الكورسات بتاعة سنة تانية تبقى أحسن. أنا ساعات وأنا بأذاكر باركز لدرجة إني بأنسى كل حاجة وبأحس إن أنا مبسوفة، إحساس غريب.. مش مبسوفة.. مشغولة. أنا بقيت محتاجة أشغل نفسي باستمرار، مش عارفة ليه. حاسة إن أنا لو ما شغلتنش مخي باستمرار حيتندي يفكر في حاجات أنا مش عايزة أفكر فيها. أنا مش عارفة إيه هي الحاجات دي بالضبط، بس أنا متأكدة إني مش عايزة أعرف. المذاكرة بتساعد.



ليلى الشرقاوي كلمتني النهارده! أنا استغربت مكالمتها جدًا  
وما كنتش متوقعها خالص. هي قالت لي إن إحنا ما ينفعش  
نبقى زملاء في الجامعة وما بتقابلش. هي قالت لي إن بكرة  
بعد المحاضرات هي حتستأني على باب الجامعة علشان نقعد مع  
بعض في كافيه. أنا وافقت وهي ضحكت ضحكة خبيثة  
(ومضحكة) وقفلت. أنا مش عارفة إيه بالظبط اللي عاجبني في  
ليلى، بس في حاجة فيها مميزة وجذابة، حاسة إنها عايشة حياتها  
كده بطريقة تانية.. بتهور؟ مش قادرة أعبر عنها بالظبط، بس  
أنا متأكدة إن الخروج معاها حيقي مسلي جدًا.



أنا بعد ما رجعت من خروجي مع ليلي أعدت أفكر  
 حاكب إيه في مذكراتي.. مذكراتي؟ أنا إمتى ابتديت أسميها  
 كده؟ اسم رسمي أوي.. أو إذا كنت حاكب أي حاجة أصلاً.  
 بس دلوقتي وأنا في السرير على وشك إني أروح في النوم،  
 قررت إني أكتب كام حاجة صغيرين عن خروجي معاها. أنا  
 عمري ما قابلت حد زي ليلي. النهارده اتأكدت إنها فعلاً  
 شخصيتها قوية ومميزة وإنها غالباً ما بتخافش من حد. هي  
 عايشة في الدور شوية علشان هي مش عايزة تبين إن تحت  
 الطريقة المرحة الصايعة بتاعتها دي هي بنت طيبة وصریجة. في  
 كل الحالات، هي دمها خفيف جداً وبتقول أي حاجة بتيجي  
 على بالها. هي سألتني أنا ليه مش باتكلم كثير فقلت لها إن أنا  
 أفضل إني أسمع قصصها لأن أنا قصصي مش مسلية أوي،  
 فقلت لي إنها مش مقتنعة وضغطت عليا إني أحكيها عن  
 نفسي. في الأول اترددت، ولكن بعد كده حكيت لها عن  
 حاجات كثير وعن أحمد، بس ما قتلهاش إن أنا كنت باحبه،  
 قلت لها إن هو كان صاحبي وإن علاقتنا كانت كويسة  
 ومسلية. هي بصتلي بصة بتدل على إنا مش مصدقاني، بس ما  
 ضغطتش أكثر من كده وقالت لي إن أنا لو عايزة أمثل، في  
 مسرحيات كثيرة أوي بيعملوها طلبة من كل الجامعات في  
 مركز الهناجر في الأوبرا وعلى المسرح القومي وفي الجامعة  
 الأمريكية. قلت لها إن أنا ما اقدرش أمثل في المسرحيات دي



لأن لو أهلي عرفوا إن أنا بامثل، الدنيا حتقلب. هي اضّايقت  
وقالت لي إن أنا إنسانة ناضجة، المفروض آخذ قراراتي بنفسني  
وإن خوفي من أهلي ده ممكن يدمر حياتي. سألتها إذا كانت  
هي بتخاف من أهلها. هي فكرت لمدة كام ثانية قبل ما ترد  
وقالت لي إنها بتخاف من إهم يعرفوا الحقيقة عنها. سألتها  
قصدها إيه، فضحكت ضحكة عصبية وقالت لي أنسي  
الموضوع. بعد كده قالت لي إن أنا لو مش عايزة أطلع على  
المسرح ممكن أمثل في فيلم من الأفلام القصيرة المستقلة اللي  
بيتعرضوا في المراكز الثقافية واللي محدش بيشفوها. قلت لها إن  
أنا سمعت عن الأفلام دي بس عمري ما شوفتها، فقالت لي إنها  
عندها أصحاب كتير في المجال ده وهي حتعرفني عليهم وإن أنا  
يمكن ألاقي دور يعجبني في واحد من الأفلام دي. سألتها إذا  
كانت هي بتحب التمثيل، فقالت لي إنها بتحب تعمل حاجات  
بجد، مش كده وكده، وضحكت. الوقت اتأخر وأنا كنت  
لازم أمشي. قالت لي إنها نفسها تشوفني تاني وأنا قلت لها إن  
أنا حاكمها قريب.

دلوقتي وأنا راقدة في السرير، أنا حاسة إني باعد الساعات  
لغاية لما اقدر أشوفها تاني. كلامها وحررتها وأفكارها.. أنا ما  
قابلتش حد زيتها قبل كده.



أنا قابلت ليلي ثاني النهارده. المقابلة بدأت في كافيه وانتهت في (Night Club)! أنا قابلتها بعد الجامعة في الكافيه اللي إحنا اتقابلنا فيه المرة اللي فاتت، وبعد ساعة، ليلي قالت لي إنها معاها العربية النهارده وإها عايزة نفسحي شوية. خدتي من إيدي وركبنا العربية وبدأنا نلف شوية. في الأول الشوارع كانت زحمة أوي والجو كان كتمة. بس على الساعة سبعة الجو اتحسن وكنا في طريقنا للمعادي. سألتها إحنا ليه رايحين هناك، فقالت لي إنها مفاجأة. وقتها قلقت. بالرغم من إن ليلي ظريفة وإن أنا باحب أقضي وقت معاها، فجأة اكتشفت إن أنا ما اعرفهاش كويس، تقريباً ما اعرفهاش خالص. كل اللي أنا أعرفه عنها إنها ساكنة في نفس المجمع مع نيفين، إنها أكبر مني بسنة، إنها معايا في الجامعة، وإها متهورة. فجأة حسيت إن أنا برضو اتقورت وإن أنا مش عارفة أنا باعمل إيه معاها في العربية. بس هي أخذت بالها وقالت لي ما اخافش وإن إحنا مش رايحين نخشش أو حاجة زي كده وإن إحنا بس رايحين نبسط شوية. بعدها بعشر دقائق، ليلي ركنت قدام فيلا صغيرة، وبعد كده مشينا دقيقتين كمان ووصلنا لـ (Night Club) صغير اسمه (Sanctuary) ودخلناه. الناس اللي جواً بصوا لنا بصة غريبة كأننا أطفال، بس ليلي طبعاً ما فرقش معاها ودخلنا وأعدنا على البار. هي طلبت ( Bloody Mary) وأنا طلبت ليمون وصودا. المكان ما كانش زحمة لما



دخلنا بس بعد ربع ساعة بقى مليون ناس والموسيقى عليت  
جداً. المكان كان صغير ولما عدد الناس زاد بقى عامل زي  
علبة السردين. الدخان ملأ المكان وأنا ابتديت أتضايق، فليلي  
سألتي إذا كان المكان مش عاجبي فقلتلها إن دي ثاني مرة في  
حياتي أدخل (Night Club) وإن أنا مش متعودة على  
الأماكن دي. ليلي قالت لي إن إحنا مش لازم نقعد كثير وإن  
هي مستنية حد معين ولما يحيي وأنا أشوفه حنمشي على  
طول. لمدة نص ساعة كمان فضلنا أعددين على البار بنتفرج  
على الناس وهما بيتكلموا ويرقصوا. في ناس كانت عايشة  
حياتها أوي ومموتين أنفسهم رقص وفي ناس ثانية كانت جاية  
علشان تتفرج. ليلي كانت أعددة بالعافية. أنا كنت حاسة إنها  
حتموت تقوم وترقص، فقلت لها تقوم، فقالت لي إنها ما  
تعرفش حد في المكان ده وإنها عمرها ما جات هنا قبل كده  
وإنها جات لغرض واحد بس. أول لما خلصت الحملة ابتمت  
وشاورت لي علشان أبص ورايا. دورت راسي وبصيت ولقيت  
واحد لسه داخل المكان. رجل شكله في أواخر العشرينات أو  
أوائل الثلاثينات، شعره أسود، وشه جذاب بطريقة غريبة. مش  
طويل أوي بس جسمه كويس ومشيته بتقول إنه عنده ثقة في  
نفسه. كان لابس بدلة رمادي من غير كرافات ومعاه بنت  
شكلها أجني ولايسة فستان تحفة لونه أحمر ومن غير ذراعات  
ومبين إن جسمها وهمي. هو أعد على واحدة من الترابيزات  
وما بصش ناحيتنا خالص. سألت ليلي هو يبقى مين وقالت لي



إنه كمال رفعت. سألتني إذا كنت عايزة أتعرف عليه وقتلتها  
لأ، الفكرة رعبتني وحسيت إن أنا لبسي وحش وشعري  
منكوش وقتلت لها لأ ثاني. ليلي ضحكت وقالت لي أستئي في  
مكاني. بعد كده قامت وراحت له. هو لما شافها ابتسم  
ابتسامة مصطنعة وسلم علينا وعرفها على الست اللي معاه.  
ليلي بصت لها بهدوء وسلمت عليها وبعد كده وطمت رأسها  
وقالت حاجة لكمال رفعت في ودنه. بعد ما رفعت رأسها، أنا  
شوفت إن الابتسامة كانت اختفت من على وشه وليلي  
سلمت عليهم وهي مبتسمة ومشيت ناحيتي. كمال كان بيص  
عليها وهي ماشية ناحيتي فشافني وابتسم ابتسامة خفيفة،  
وفجأة لقيت نفسي بابتسم له، وبعد كده بص للست اللي  
معاه كأني ما ليش وجود. ليلي أعدت جني ثاني وأعدت  
تضحك. سألتها قالت له إيه. بصتلي وابتسمت وقالت لي إنه  
لسه يلعب معاها ولكنها مش حتستسلم لغاية لما تجيبه. قلت  
لها هي عايزة منه إيه بالظبط. قالت لي بمنتهى البساطة إنها  
عايزاه يحبها. بعد كده كملت شرب وبعدها بخمس دقائق  
مشينا. أنا وصلت البيت الساعة تسعة ونص. بابا كان مستنيني  
وشايط. أنا كنت كلمت ماما من الموبايل وقتلت لها إني  
حاتأخر لأن عندي مراجعة بس ده كان على أساس إن أنا  
أكون في البيت على سبعة أو سبعة نص بالكثير. أنا رجعت  
تسعة ونص وبابا كان منهار وسألني أنا ليه ما ردّتش على  
التليفون، طبعا ما قدرتش أقوله إني ما سمعتوش من صوت



الموسيقى العالي وأنا أعدة على البار، فقلت له إني كنت لسه في المحاضرة وعاملة تليفوني (Silent). طبعاً ما عجبوش الكلام وهزّاني وقال لي إن هو ما يثقف فياً وإن الأمور لازم تتغير وإلخ، إلخ، إلخ. الخلاصة إن أنا حابقي تحت الرقابة لغاية لما اتخرج.

كل ده مش مهم. المهم إن أنا مش قادرة أنسى الليلة دي ومش قادرة أنسى كمال رفعت. ليه هو جذاب أوي كده، هل أنا كنت هبلة لما حسيت إن هو ممكن يكون أعجب بيّ لما شافني مع ليلي؟ على الأقل أنا دلوقتي فاهمة سر هوسها بيه، بس برضو مش للدرجة دي. هو أكبر منا بكثير، بعشر سنين على الأقل، ومن منظر الست اللي كانت معاه النهارده، هو ذوقه في الستات مميز جداً وليلي بالرغم من جمالها ما تقدرش تنافس واحدة ست زي دي. ولأ تقدر؟ أنا ابتديت أقتنع إن ليلي تقدر تعمل أي حاجة.



النهارده قابلت نيفين في النادي وحكيت لها عن خروجي مع ليلي. هي ما استغربتش إن أنا وافقت أخرج مع ليلي، بس إن أنا وافقت أروح معاها لـ (Night Club) وسط الأسبوع. أنا فهِمْتها إن أنا تقريباً اتخطفت وإن أنا ما كنتش عارفة إحنا رايمين فين. لما قلت لها إن أنا شوفت كمال رفعت وإن هو السبب إن ليلي راحت هناك، نيفين استغربت أكثر وقالت إنها ما كانتش عارفة إن ليلي مهووسة بكمال رفعت للدرجة دي. بعد كده سألتني شكله إيه ووصفته ليها على أد ما قدرت، بس حسيت إن أنا مهما عملت مش حاقدر أوصفه صح. قلت لها أد إيه هو جذاب وإن هو أصغر من ما أنا كنت متخيلاه. من كلام ليلي ونيفين، افكرت إنه في أواخر الثلاثينات، بس لما شوفته عرفت إنه يا إما في أواخر العشرينات يا في أوائل الثلاثينات. نيفين قالت بتهرج إن أنا شكلي معجبة بيه. أنا اتكسفت شوية من التعليق ده، بس اضطررت إني أعترف إن أنا فعلاً أعجبت بشكله وبثقته في نفسه، بس أنا عارفة إن واحد زيه، لافف ودابير، عمره ما حيعجب بواحدة زيه. بجانب إن أنا أصغر منه بعشر سنين على الأقل. نيفين قالت إنها لسه مش قادرة تتخيل إيه سره،



بس موضوع السن ده مش مهم أوي للدرجة دي، بالذات لأن  
عشر سنين ده مش فرق كبير. أنا سألتها إذا كانت مستعدة  
تتجاوز واحد أكبر منها، فقالت لي إنها مستعدة تتجاوز أي حد  
طالما هي بتحبه وهو بيعبها. وقتها سألتها عن الإنسان الوحيد  
اللي هي قالت إنها حبه، بس هي قالت إن ده موضوع قديم  
وما فيهوش تفاصيل كثير. الخلاصة إن في حاجات كثير كانت  
واقعة في طريقهم، أهمها إن هو ما كانش عايز يرتبط بجد،  
وبالرغم من إن نيفين ما كانتش بتفكر في الجواز في السن ده،  
لكن بعد ما قال لها كده حسّت إنه مش واحد العلاقة بنفس  
جديتها. شوية بشوية، الخلافات زادت لغاية لما افترقوا. كلامها  
عن حبيبها فكريني بأحمد وفجأة حسّيت بفيضان من الذكريات  
والأفكار والأحاسيس اللي أنا باكتبها على أد ما باقدر. نيفين  
خدت بالها وسألتني إيه اللي على بالي، فقلت لها إن أنا فجأة  
افتكرت حاجة وسألتني إذا كانت هي نفس الحاجة اللي أنا  
كنت عايزة أقولها يوم العزومة. فاستغربت جدًّا وسألتها هي  
ازاي عرفت إن أنا كنت عايزة أقول لها حاجة يوم العزومة بس  
ما قدرتش. قالت لي إنها بالرغم من إنها ما شافتنيش من سنين،  
بس هي صاحيتي من وإحنا في حضانة وإها فاهماني أكثر من  
أي حد وبتعرف لما بيكون في حاجة على بالي. ترددت جدًّا  
لأني ما كنتش متأكدة إذا كنت لسه عايزة أقول لها على



موضوع الساعات التي اختفت من ذاكرتي وأنا في الجامعة. مش عارفة ليه، بس كل ما بafكر في الموضوع ده باحس بالخوف. بس لما بصيت في وش نيفين حسيت إن أنا عايزة أقول لها، محتاجة إن أنا أقول لها، فحكيت لها القصة. هي قلقّت جدًّا وقالت لي إني ما كانش المفروض أسكت على حاجة زي كده وإن من أكثر الحاجات اللي بتضايقها من المصريين هي خوفهم وإحراجهم من أي حاجة ممكن تكون محتاجة لدكتور، كأن المرض حاجة المفروض الواحد يستعر منها. قالت لي إن اللي حصل ليا ده اسمه (Black Out)، وإن أنا لازم أشوف دكتور فورًا. قلت لها إن أنا مش عايزة أقلق أهلي على الفاضي، فقالت لي إن أهلي مش لازم يعرفوا خالص، وإن هي ممكن تاخدني للدكتور بنفسها. قالت إنها تعرف دكتور كويس جدًّا ساكن معاها في المجمّع، اسمه مدحت عزمي، وإن هي حتكلمه وتجيّب لي ميعاد بسرعة. ما قدرتش أقول حاجة وحسيت إن أنا كنت فعلًا غلطانة وإني كان لازم أروح لدكتور من الأول.



نيفين لسه مكلماني وقالت لي إنها جابتلي ميعاد مع الدكتور. بتقول إن هو حيشوفني بكرة في العيادة اللي في بيته الساعة سابعة. قلت لنيفين إني خايفة حد من أهلها يشوفني وأنا في المجمع وقالت لي إن محدش حيعرف وإن المجمع كبير جدًا وفيلا الدكتور في حته بعيدة خالص عن بيتهم، ولو حد شافنا حنقول إن أنا كنت جاية أزور نيفين.

أنا خايفه أوي. خايفه من اللي حيقوله الدكتور. هل حيعرف السبب؟ هل حيقدر يقول لي إيه اللي حصل في الثلاث ساعات دول؟



نيفين عدت علياً بنفسها وأخذتني للمجمع. هي تعبت نفسها أوي علشان، رايحة وجاية من ٦ أكتوبر علشان أنا ما بأسوقش. أنا مش عارفة حارد لها الجميل ازاي. طول الطريق أنا كنت حاسة بالتوتر، مش نفس التوتر العادي اللي أنا باحس بيه دائماً وأنا رايحة لأي دكتور، لأ. إحساس إن أنا لو قابلت الدكتور ده ممكن يقول لي حاجة تغيرني للأبد. مش عارفة ليه فكرت التفكير ده. دلوقتي، بعد الزيارة ما نمت، أنا اتأكدت إني كان عندي حق أخاف.

نيفين ركنت في شارع جانبي واتمشينا لغاية الفيلا. هي فيلا كبيرة وفخمة جداً، ثلاث أدوار وحواليها عواميد نور. شكلها كأنها طالعة من فيلم إنجليزي قديم. الدنيا كانت ضلّمت خلاص والمنطقة اللي فيها الفيلا كانت هادية خالص، ولما سألت نيفين إيه سبب الهدوء ده، قالت لي إن دي أغلى منطقة في المجمع وإن أغلب الفيلات مش ساكنة. ضربنا الجرس والدكتور مدحت عزمي قابلنا بنفسه. هو رجل شيك جداً، كبير في السن، يعني متهيألي في أوائل الخمسينات. عنده دقن خفيفة، وكان لابس (Pullover) أسود خفيف على بنطلون أسود. هو إداني إحساس إنه فنان أكثر من ما هو دكتور. هو



وشه بيدل على إنه ذكي جداً. كان مبتسم لما فتح الباب لأنه كان متوقعنا. نيفين عرفتنا على بعض بسرعة وهو شكرنا على إننا جينا في الميعاد بالظبط. بعد كده قال لنا إن إحنا ممكن نبدأ فوراً وروحنا لمكتبه. بعد ما دخلنا المكتب سألني إذا كنت أفضل إن نيفين تستنى برّاً لغاية لما الجلسة تخلص، وساعتها افتركت فجأة إن نيفين قالت لي إنه طيب نفسي. لما قالت لي كده امبارح ما اعترضتش، بس وأنا أعدة في مكتبه حسيت إن أنا على وشك إني أعمل حاجة مش عايزة أعملها وتوتري زاد. الدكتور أخذ باله وكرر سؤاله مرة تانية بهدوء، فقلت إني أفضل إن نيفين تفضل معايا. هو ما اعترضش وسألني إذا كانت دي أول مرة ليا عند طبيب نفسي، فقلت له أيوة. بعدها طلب مني إني أشرح له مشكلتي وقال لي إني ممكن أقول أي حاجة وحتفضل سر عمره ما حيخرج برّاً المكتب. أنا صدقته على طول، مش عارفة ليه. غالباً كانت الطريقة الهادية المطمئنة اللي هو كان بيتكلم بيها أو يمكن وشه. عينيه فيها حاجة خلّتي أطمئن. المهم إن أنا استريحت له وبدأت أتكلم. قلت له القصة كلها وهو سمع بتركيز شديد وكتب بعض الملاحظات في النوتة اللي قدامه. بعد ما خلصت سألني إذا كان أغمى علياً قبل كده وقلت له لا. سألني شوية أسئلة طبية عن إذا كان عندي السكر أو ضعف في القلب وإذا كان بيحيلي صداع مستمر أو نغز في



صدرني. قلت له لأ. أكثر حاجة استغربتها إنه سألني إذا كان عندي صرع ونيفين برضو اتفاجئت ولكن أنا أكّدت له إن أنا صحيّ كويسة. هو فكر لمدة ثواني وبعد كده قال لي إن اللي حصل لي ده ممكن يكون حاجة اسمها (T-LOC)، وهو فقدان الوعي المؤقت وإن ده أسبابه كتيرة، من أهمها الصرع، ولكن من ضمنها اضطرابات في وظائف المخ أو مشاكل في الدورة الدموية. لكن هو بيشك إن ده اللي حصل. هو في رأيه إن اللي حصل لي غالبًا كان حالة بتسمّى (Transient Global Amnesia) أو فقدان ذاكرة مؤقت، وإن ده من أهم أسبابه الضغط العصبي أو النفسي اللي ممكن إنه يفضل يتراكم ويزيد لغاية لما ينفجر في شكل فقدان مؤقت للذاكرة. وقتها الواحد ممكن يلاقي نفسه في مكان مش عارف فين أو وصل هناك ازاي أو حتى هو مين. أنا قلت له إن ده بالظبط اللي حصل لي. هو قال لي إن ده معناه إن أنا كنت تحت ضغط عصبي شديد جدًا وإن أنا لازم أعرف سبب المشكلة وأحاول أحلها لأنها بدأت تأثر على صحيّ. هو سألني إذا كنت عارفة إيه اللي كان أو لا زال ضاغط على أعصابي بالشكل ده. فجأة حسيت إن أنا مطلوب مني أفكر في حاجات كتير كلها مش كويسة، حاجات أنا مش عايزة أفكر فيها. هو طبعًا لاحظ توترني وترددي وقال إنه من رأيه إن نيفين تستنى برّا لغاية لما



نخلص ونيفين بصّت لي وأنا ما بقتش عارفة أعمل إيه، ولكن فجأة قررت إن أنا عايزة أتكلم مع الدكتور لوحدي، فقلت لها إنها ممكن تستّاني برّا وإن أنا مش حاتأخّر. هي قامت على طول وقالت لي آخذ وقتي وإنها حتستّني برّا في الصالون. بعد ما خرجت نيفين، الدكتور قال لي إن أنا مش مضطرة أقول له أي حاجة أنا مش عايزة أقولها ولكن هو واجبه إنه يساعدني أواجه الحاجات اللي مضايقاني أو مخوفاني لأي سبب. أنا قلت له إن أنا مش عارفة بالظبط إيه اللي ممكن يكون ضغط عليّا للدرجة دي، فقال لي مش لازم تبقى حاجة واحدة، ممكن تبقى حاجات كتير كانت مضايقاني وتراكت علي بعضها، أو إن أنا اتجنبت مواجهتها لفترة طويلة أوي لغاية لما حصل انفجار. قال لي إني آخذ وقتي وأحاول أفكر الحاجات اللي كانت مضايقاني في خلال الشهور اللي فاتت. أنا ما احتجّتش أفكر كتير. كل حاجة كانت موجودة في مخي، مستجيبة ومنتظرة إني أطلق سراحها علشان تظهر وتكلم. أنا كنت عارفة إيه اللي ضاغط عليّا لكن فضلت إني أعيش في إنكار. قلت له عن أحمد وعن سفره، وعن رغبتني إني أكون ممثلة ودخولي تجارة إنجليزي لأني جيت مجموع مش علشان أنا كنت عايزة أدخل تجارة. قلت له عن الملل اللي أنا باحس بيه وأنا أعدة لوحدي و لإحساسي إن أهلي في عالم تاني، رجعي، وإني



مش قادرة ألبأ لهم وأقول لهم أي حاجة عن نفسي وعن  
مشاكلي. قلت له إني ساعات باحس إني وحيدة جدًا لدرجة  
إن أنا لو بطلت أرد على التليفون أو أظهر قدام الناس محدش  
حياخد باله. وإن أنا ساعات باحس إن حياتي حتفضل كده  
للأبد من غير ما تتغير وإن أنا شوفت كل اللي أقدر أشوفه وإن  
نهايتي حتبقى زي مامتي، ست بيت من غير شخصية ولا حياة.  
هو ابتسم وقال لي إني ذكية وجريئة جدًا وإنه سعيد إني قلت  
الحقيقة على طول وإني مش زي أغلب المرضى بتوعه اللي  
بيحتاجوا ثلاث جلسات على الأقل علشان يعترفوا إنهم مش  
سعداء في حياتهم. أنا برضو ابتسمت وبالرغم من أنا قلت  
وفكرت في حاجات بتضايقني، بس وقتها حسيت إني فوقت  
وإن في تقل اتشال من عليا. هو قال لي إن أنا باعاني من  
اكتئاب شديد وإن أنا عايشة في حالة إنكار وكبت وإن أنا  
لازم أحاول أغير طريقة عيشتي وما اسمحش لحد إنه يتدخل في  
سعادتي طالما سعادتي ما بتتدخلش في حياة أي حد تاني. هو  
قال لي إن أنا إنسانة ناضجة ممكن تاخذ قراراتها بنفسها وإن أنا  
لازم أبتدي أدور على الحاجات اللي حتخليني أبقى إنسانة  
سعيدة تاني وراضية عن حياتي، وإذا كان ده معناه إني أسيب  
تجارة وأبتدي من جديد في كلية تانية، فأنا المفروض أعمل كده  
لأن في الآخر الواحد بيعيش مرة واحدة. أنا ضحكت وقلت له



إن هو يتكلم كأن أهلي مالهش وجود، فقال لي إن أهلي  
طبعاً مهمين وإن أنا لازم أراعي شعورهم، ولكن بحدود ومن  
غير ما أدمر حياتي علشان أرضيهم، لأن ده في الآخر مش  
حيسعدني ولا حيسعدهم حتى لو هما ما فهموش ده دلوقتي.  
وبالنسبة لأحمد، فهو قال لي إن أنا لازم أحط الجزء ده من  
حياتي ورايا، لأنه انتهى. وإن أنا بالرغم من إني ممكن أفضل  
أحبه، لكن الحقيقة إن الدنيا بتتحرك لقدام وإن ده جزء من  
الماضي وإن أنا لازم أفتح عقلي ومشاعري للمستقبل ولتجارب  
جديدة لغاية لما ألاقى الشخص اللي يسعدني ويناسبني. كلامه  
كان طبعاً مقنع ومنطقي وحسني إن أنا لازم أحاول أواجه  
مشاكلي وأحسن حياتي، بس ما قالش ازاي. هو بعد كده  
كتب لي اسم دواء مهدئ قال لي آخده ثلاث مرات في  
الأسبوع، وقال إنه عايزني أعمل رنين مغناطيسي على المخ  
علشان نتأكد إن أنا ماعنديش أي حاجة ممكن تكون اتسببت  
في فقدان الذاكرة اللي حصل لي. فقلت له إني حاحاول أعمله  
في أسرع ما يمكن. لكن، ما بيني وما بين نفسي، كنت عارفة  
إني عمري ما حاعمله. هو بعد كده إداني الكارت بتاعه  
وكتب على ظهره ثمرة موبايله وقال لي إن أنا لو احتاجت أي  
حاجة ممكن أكلمه أي وقت. أنا انبسطت جداً لما قال لي كده



لأني بالرغم إني ما كنتش متأكدة إني حاشوفه تاني، كنت عارفة إني أحب أبقى على اتصال بيه.

ونيفين بتوصلني البيت طمّنتها وقلت لها شوية من اللي هو قاله لّيا (بس مش كل حاجة طبعاً) وما قتلهاش على موضوع الرنين المغناطيسي اللي هو طلبه علشان كنت متأكدة إنها لو عرفت مش حتبطل سؤال إلا لما أعمله، فقررت إني أخصّي عنها الموضوع. أنا قبل ما أخرج من مكتب الدكتور عزمي سألتة إذا كنت عمري حافتكر اللي حصل في الثلاث ساعات دول. قال لي إن في الأغلب ذاكرتي حاترجع بالتدريج. دلوقتي وأنا أعدّة في أوضتي، اكتشفت إن أنا مش عايزة أعرف إيه اللي حصل في الساعات دي، مش عارفة ليه، بس حاسة إنه حيقى أحسن لو ما عرفتش.



النهارده وأنا أعدة في محاضرة الدكتور أيمن، حسيت إن أنا زهقانة، بس مش زي الأول. حسيت إن أنا قدرتي على تحمل ملل الجامعة زادت. يمكن جزء من السبب إن أنا عارفة إن الوقت اتأخر أوي على إني أسيب الكلية وإني لازم أخرج، ويمكن جزء ثاني من السبب إن أنا حاسة إن في حل وسط، إن أنا مش علشان بادرس تجارة يبقى لازم حياتي تنتهي. أنا حاحاول أعمل حاجات ثانية وحاحاول أغير حياتي بأي شكل. الدكتور عزمي كان كلامه ضح، (بالرغم من إن كلامه عن مواجهة أهلي ما كانش واقعي). أنا لازم أحاول أحسن كل حاجة.

\*\*\*\*

صدفة غريبة جدًا. أنا كنت لسه النهارده بأفكر إني لازم أحاول أجدد من حياتي وإن ماتبقاش الجامعة هي حياتي كلها، وفجأة ليلي اتكلمت وقالت لي إنها عايزاني أقابل واحد صاحبها اسمه مروان المغربي، مخرج مستقل بيعمل فيلم قصير. لما حككت له عني، قالها إنه يحب يقابلني. أغرب صدفة ممكن تحصل! بس أنا حامثل قدام الكاميرا ازاي؟ مين ممكن يشوف الفيلم؟ أهلي ممكن يعرفوا، و دي حتبقى كارثة. مش مهم دلوقتي. أنا لازم أقابله وأشوف إيه اللي حيحصل.



أنا لست راجعه من مقابلة مروان وليلى. هو دمه خفيف جدًا وفعلًا فنان. هو حكى لي قصة الفيلم بتاعه وعجبتني جدًا. قصة غريبة مش عارفة أوصفها ازاي. هي قصة بوليسية، رومانسية وغامضة. لو اتعملت صح ممكن تبقى فيلم خطير. هو إدائي (DVD) فيه الفيلمين اللي هو عملهم قبل كده. أنا حاتفرج عليهم دلوقتي. الأهم من ده كله إنه عايزني أشارك في الفيلم. أنا في الأول كنت مكسوفة أقول له إني خايفة أمثل علشان أهلي. بس في الآخر لما اتشجعت وقلت له، قال لي إن دي حاجة بايخة فعلًا، بس هو قابل بنات كتير قبل كده عندهم نفس المشكلة وإنه بالرغم من إنه نفسه أمثل معاه في يوم من الأيام، لكن هو بعد ما شافني وسمعي عرف على طول إنه بجانب التمثيل قدام الكاميرا هو عنده دور ثاني ليا. أنا طبعا ما فهمت قصده، لكن هو قال لي إن الفيلم فيه صوت فوق الصورة أو (Voice Over) كتير وإنه كان بيدور على حد صوته جذاب ومميز وإنه أول لما سمع صوتي والطريقة اللي أنا باتكلم بيها، عرف إن أنا لازم أعمل الدور ده. أنا استغربت الفكرة في الأول وبعد كده فكرت إن بالرغم من إني ما شوفتش الحكاية دي في أفلام عربي كتير لكن إن أنا شوفتها



كثير جداً في الأفلام الأجنبي وكانت بتعجبني. طبعاً وافقت.  
قال لي إنه حبيعتلي السيناريو على الـ (Email) بكرة. أنا  
مبسوطة أوي، مش مصدقة إن الموضوع بالبساطة دي. أنا بقي  
لي تقريباً عشر سنين ما مثّلتش وفي خلال أسبوعين حامّلت ثاني  
حتى لو مش على المسرح أو على الشاشة. أنا نفسي أجرب  
ثاني، نفسي أحس بنفس الإحساس اللي كنت باحس بيه  
زمان. يا ترى حنسجل ازاي؟ حيبقي إحساسي إيه وأنا باعبر  
بصوتي بس؟ حيبقي تحدي. أنا مش قادرة استنى! أنا حاروح  
اتفرّج على الفيلمين اللي مروان عملهم.



الفيلمين بتوع مروان تحفة. هو طريقته مختلفة خالص عن الطريقة اللي بيخرجوا بيها الأفلام في مصر. المود مختلف، التمثيل مختلف. هو فعلاً موهوب. أنا باعدّ الأيام. هو لسّه ما بعتش السيناريو، بس أنا مش قلقانة. أنا عارفة إنه مشغول. أنا كلمت ليلي تاني النهارده وهريتها شكر. قلت لها إن أنا مش عارفة حارد لها الجميل ازاي وإنها عملت لي خدمة العمر. ضحكت وقالت لي أخلي بالي ولأ حتطلب مي خدمة جامدة أوي، فضحكت وسألته زي إيه مثلاً، فقالت لي زي إن أنا لما أتشهر أوي أبقى أعزمها على الـ (Premiere) واقعدّها جنب الممثلين الحلوين.



النهارده وأنا مروحة البيت قرورت إني أعمل حاجة ما  
كنتش متخيلة إني ممكن أعملها ثاني. مش عارفة ليه، بس أنا  
حاسة إني لازم أرجع للسباحة ثاني، مش للفريق والتمرينات  
كل يوم، بس أتمرن بنفسي مرة أو مرتين في الأسبوع. أنا  
حاسة إني محتاجة ده وإن ده حيريجني. والحقيقة إن أنا جسمي  
ابتدا يهرهر شوية وعضلاتي محتاجة تشد ثاني. أنا من بكرة  
حاروح النادي وحابدأ سويدي يا ترى نفسي شكله إيه  
دلوقتي؟



مروان بعث لي السيناريو وقرأته. تحفة! أنا لما قابلته مع ليلى  
 وحكى لي القصة كنت عارفة إن فكرة الفيلم حلوة وجديدة،  
 بس السيناريو باين لي إن القصة هائلة، محبوكة جدًا. أنا دوري  
 أكبر من ما أنا كنت فاكرة، عندي حوالي سبع صفحات  
 كلام. أنا خالعب دور أول ضحية للقاتل، اللي بتحكي  
 للمشاهدين تجربتها وازاي هي اتقتلت. شوية من الكلام  
 جريء سنّة، بس أنا حاتعود عليه. أنا حابدأ أتدرب النهارده  
 بعد ما أرجع من النادي.

\*\*\*\*

التمرين كان أصعب من ما أنا كنت فاكرة. الجو كان برد  
 أوي وعضلاتي خدت وقت لغاية لما سخنت. أنا بالغت شوية  
 ولعبت زيادة عن المفروض كنت أعبه، بالذات لأنني بقي لي  
 سنة تقريبًا ما اتمرنتش. كنت حاشد عضلة السمانة الشمال بس  
 لحقت نفسي ووقفت. أنا لازم أكمل سويدي يومين كمان  
 على الأقل قبل ما أنزل المياه. بس أنا حاكمّل. مجرد وجودي  
 في الملعب النهارده رجع لي أحاسيس وذكريات كلها جميلة  
 وخلاني أسأل نفسي أنا ليه بطلت أصلًا. وبعد كده افكرت  
 إن أنا بطلت وقت ما كنت مع أحمد.



النهارده نزلت المياه لأول مرة. إحساس جميل. نفسي كان أطول ما كنت متخيلة. عملت (10 Laps)! ما قابلتش حد من الفريق بس قابلت مس ألفت. هي فرحت جدًا لما شافتني في المياه وقالت لي إنها نفسها إني أرجع للفريق، فقلت لها إن أنا ما قدرش وإني مشغولة جدًا في الجامعة. هي طبعا زعلت وقالت لي إنها فاهمة ظروفي، بس أهو على الأقل أنا رجعت للعباه والتمرينات حتفيدني في حياتي ومذاكرتي. وبعد كده شافت جسمي وقالت لي إن أنا محتاجة أحس اتنين ثلاثة كيلو وحابقي تمام. أنا كنت عارفة إن أنا محتاجة أحس، بس كنت فاكرة إن أنا المفروض أحس أكثر من كده، بس بعد ما المدربة قالت اتنين أو ثلاثة كيلو فرحت وقلت هي أدري! أنا حفظت دوري خلاص وباتمرن في النادي كل يوم. أنا رجوعي للسباحة كان له ميزة ما فكرتش فيها وهي إن ماما وبابا بقى بيسيوني تأخر شوية كل يوم بعد الجامعة علشان التمرين، وده بيديني فرصة إني أتمرن على السيناريو من غير مشاكل. أنا خلاص حاموت وعازية أبدأ تسجيل. مروان قال لي إن إحنا حنسجل الأسبوع الجاي قبل ما يبدأ تصوير لأنه عايز صوتي يبقى متسجل وجاهز للـ (Playback) وقت التصوير نفسه، لأن



ده يساعدو يظبط مدة اللقطات في المونتاج. هو قال لي إن  
التسجيل حيقى في أستوديو صغير في شارع النيل في العجوزة  
وإن إحنا حنسجل يوم الجمعة والسبت علشان أبقى فاضية  
ومش مشتتة. أنا مش قادرة أستنى!



النهارده وأنا باستحمي خدت بالي من الجرح اللي عندي  
من عملية الأعور. قبل ما ألبس بصيت عليه في المرايا ودققت  
فيه أوي. فجأة افكرت حلم حلمته من فترة مش قادرة أفكر  
إمى. في الحلم كنت ماشية في شارع مهجور بالليل شكله كان  
مش غريب عليا. وفجأة لقيت نفسي في بدروم قدامي مانيكان  
بلاستيك عريانة ومن غير باروكة. لما قربت لقيتها عندها نفس  
جرح العملية اللي عندي، حتى الحسنة اللي فوق الجرح كانت  
موجودة على جلد المانيكان البلاستيك. أنا خفت وبعدت عن  
المانيكان وفجأة لقيت نفسي في الشارع تاني. أنا دلوقتي  
مستغربة إني مش فاكرة أنا حلمت الحلم ده إمى، بس أنا  
متأكدة من حاجتين. إن أنا شوفت المانيكان دي قبل كده في  
حتى وإن أنا عارفة الشارع ده. أنا لما أنزل الزمالك المرة الجاية  
حاناكد.



نيفين كلمتني النهارده وسألت عليًا وسألتني أنا محتفية فين.  
قلت لها على السباحة وعلى الفيلم وعلى قرف الجامعة. هي  
قالت لي إنها مبسوطه جدًا علشانى وبالذات على موضوع  
الفيلم وإنها نفسها تشوفه جدًا. فجأة ابتديت أخاف تاني. أنا  
من وقت ما قابلت مروان وأنا ما فكرتتش إن الناس حتشوف  
الفيلم ده. بس فيها إيه، أنا مش طالعة فيه خالص، وحتى إذا  
حد عرف صوتي ممكن أنكر إنه أنا، وإذا ما قدرتش أنكر..  
حاتصرّف.. نيفين قالت لي إن الدكتور عزمي يبسلم عليًا  
وسأل على أخباري وهي قالت له إن أنا كويسة. لما نيفين  
قالت لي إنه سأل عليًا ضميري ألّبيني إني ما عملتش الرنين  
المغناطيسي اللي هو طلبه، بس أنا دلوقتي كويسة ومش حاسة  
إن في داعي. المهم دلوقتي إنه فاضل يومين وحاسجّل. أنا لازم  
أتمرّن النهارده شوية كمان.



النهارده قابلت باكي ونادين ومريم (اللي ظهرت ثاني بعد اختفاء طويل) وحكيت لهم عن الفيلم ودوري فيه، وقلت لهم عن ليلى وإن هي ازاي ساعدتني اقابل مروان. والغريب إني ما حكيت لهمش عن خروجتي معاهما لـ (Sanctuary). مش عارفة ليه، بس حسيت إن أنا مش عايزة أقول لهم على الجزء ده بالرغم من إن أنا عادة ما باخبيش حاجة عنهم وبالذات عن باكينام، بس في الآخر برضو ما قلتش حاجة. بس قلت لهم عن كمال رفعت وعن القصص اللي أنا سمعتها عنه (ما قلتش إن أنا شوفته بعيني!)، ومريم قالت إنها سمعت عنه برضو وعن مشاكله. سمعت إنه شاب متهور جدًا ودخل السجن وإن سمعته مع البنات فظيعة وله أكثر من فضيحة. هي قالت إنه ابن رجل غني، عضو في مجلس الشعب أو حاجة زي كده، وإهم ساكنين في فيلا كبيرة أوي في أكتوبر. باكي ونادين كان شكلهم مهتم جدًا وكنت خلاص على وشك إني أقول إني شوفته، بس برضو في حاجة جوايا منعتني. بعد كده رجعوا يسألوني ثاني عن الفيلم وعن تفاصيل القصة وعن بداية التسجيل. وقتها حسيت إن مبسوطه جدًا وعندي مائة ألف حاجة أحكي عنها، بس في نفس الوقت حسيت إني خايفة لأني كنت عارفة إني بكرة حابداً تسجيل. أتمنى يجد إني ما الخطبش الدنيا!



أنا لست راجعة من أول جلسته تسجيل وما قدرش أقول حاجة غير إني طيارة! مروان فعلاً فنان وأنا وهو اندمجنا على طول، وتعليماته كانت واضحة ومفيدة. دي كانت أول مرة أدخل أستوديو في حياتي وأول لما دخلت المكان حسيت إني مستريحة وكأني دخلته قبل كده. الهدوء، المعدات والإضاءة الخافتة كلها إديتي إحساس جميل، إن إحنا في مكان منعزل وإن إحنا لوحدها خالص في الدنيا. غرفة التسجيل كانت مليانة ميكروفونات أشكال وألوان، في منهم كان نازل من السقف وفي منهم كان على (Stands) زي اللي أنا عارفاهم من المسرح بس أكبر شوية. ما كانش في حد في الأستوديو غيري أنا ومروان ومهندس الصوت، اسمه جمال وهو شخص ظريف جداً، هادي ومحترم. هو وراني الميكروفون اللي أنا حاستعمله (واحد من اللي على Stands) وقال لي إن إحنا حنقدر نسمع بعض على الـ (Head Phones).

بعدها بربع ساعة بقيت واقفة لوحدي في ناحية ومروان وجمال في الناحية الثانية وفي لوح زجاجي يفصل ما بينا. في الأول كنت خائفة ومتوترة جداً وأعدت أشرب مياه قبل ما أبدأ أي جملة لأنني كنت حاسة إني ريقني ناشف طول الوقت. بعد عشر دقائق ابتديت اتعود على الموضوع كله وبدأنا تاني



من الأول. الأداء كان متعة ما تتوصفش. أنا جربت طرق مختلفة أقول بيها الكلام، ومروان كان بيلاقي اللي هو عايزه على طول. تعليماته كانت واضحة جدًا وهو فعلاً ساعدني إني أبقى مستريحة ومش متوترة. هو كان فعلاً مستغرب وقال لي إنه مش مصدق إن دي أول مرة أسجل فيها (Voice Over). الوقت طار وخلصنا تسجيل الساعة ستة. بعد كده مروان سمعني شوية من الـ (Takes) وما صدقتش نفسي لما سمعت صوتي طالع من السماعات.

حسيت إنه صوت واحدة تانية، كأنه مش صوتي خالص وحسيت إني حاعيط من الفرحة. مروان قال لي إن التسجيل لسه حيتعدل شوية كمان وحيضاف عليه (Effects) علشان يندمج أكثر مع صورة الفيلم ومع الموسيقى لما تتسجل. وبعد كده قال لي إن جلسه النهارده كانت نجاح ساحق وإن إحنا خلصنا ساعتين بدري بسبب جودة أدائي. وقتها عيني دمعت وضحكت وقال لي إن إحنا حنكمل بكرة في نفس الميعاد. أنا شكرته لغاية لما زهق وبعد كده رجعت البيت. أنا مش قادرة أوصف إحساسي. أنا حاسة إن أنا فعلاً باعمل حاجة باحبها، حاجة كان المفروض أعملها من زمان. أنا حاسة بإحساس ما حسّتش بيه من سنين. أنا عايزة أحس بالإحساس ده دائماً. أنا لازم أستمّر في التمثيل مهما حصل. بكرة فاضلنا أربع مشاهد كمان. أنا قلقانة جدًا، بس مش من الأداء نفسه. أنا قلقانة إن إحنا نخلص بكرة بسرعة.



جلسة التسجيل النهارده كانت هائلة. إحنا خلصنا بسرعة. سجلنا الأربع مشاهد اللي فاضلين في ساعة ونص. مروان كان هادي جدًا وأنا كنت خلاص فهمت هو عايز إيه، فعرفنا نوصل للنتيجة أسرع. بس مش دي أهم حاجة حصلت. أنا قابلت كمال رفعت في الاستوديو! أنا ما كنتش مصدقة نفسي. لما شوفته بيدخل الاستوديو ويسلم على مروان وجمال، حسيت كأني بالتخيل. إيه اللي ممكن يجيبه هنا؟ مخي ما عرفش يجيب أي إجابات. بعد كده مروان عرفني عليه وأنا عملت نفسي ما اعرفوش، وهو أخرجني وسألني إذا كنت صاحبة ليلي الشرقاوي وقلت له أيوة. هو ابتسم لي ابتسامة.. مش عارفة أوصفها ازاي. ابتسامة شقية، خبيثة؟ حاجة زي كده. لحظتها عرفت ليه بنات كثير حتنجن عليه. من قريب هو جذاب بطريقة مش طبيعية. نظرتة وابتسامته ووقفته، كل حاجة بيعملها فيها ثقة. هو ممكن يكون مغرور شوية، بس أنا متهيألي إن أنا لو عرفته أحسن حاكتشف إن ده غالبًا مش صح. مروان بعد كده قال لي إن كمال رفعت يساعد مروان في إنتاج الفيلم وإن الاستوديو نفسه يبقى بتاع كمال رفعت. أنا وقفت في مكاني بابتسم زي الهيلة، بس ما كانش عندي حاجة أقولها.



كمال قال إنه لما شاف السيناريو قرر إنه يساعد مروان بأي طريقة وإنه دائماً كان مهتم بالسينما المستقلة ونفسه يساعد المخرجين المستقلين بأي طريقة. قال إنه شاف الفيلم اللي مروان عملهم وعجبه جداً. بعد كده مروان قال إنه لما قال لكمال إنه اكتشف موهبة جديدة مميزة جداً، كمال قرر إنه يجي يقابلني بنفسه ويسمع شوية من التسجيل. وقتها جمعت إن مروان بيتكلم عني. وشي أحمر وفكرت إن لازم أخرج من الاستوديو بسرعة قبل ما يشغلوا التسجيل لأن أنا ما كنتش حاقدر أقعد أسمع نفسي قدام كمال رفعت. كنت مكسوفة جداً إن أدائي ما يعجبوش. حاجة غريبة جداً لأن أنا ما جاليش الإحساس ده امبارح لما مروان شغل التسجيل. بس مع كمال رفعت كل حاجة اختلفت. بس اللي حصل إن أنا اتكسفت إنني ألفت الانتباه ليا أكثر من كده وأقول إن أنا لازم أمشي وأشرح السبب (الخيالي). فكلنا أعدنا وجمال شغل التسجيل. أنا أعدت وراهم وحسيت إنني حانفجر من الكسوف، بس بعد ما كمال سمع كام (Take)، قال لمروان إن هو كان عنده حق وإن أنا فعلاً موهبة مميزة جداً. بعد كده أتدور وبص لي وقال لي إن الخطوة الجاية هي إن أنا أظهر على الشاشة. أنا ضحكت وشكرته جداً على كلامه وقمت من مكاني، فقام هو كمان وقال لي إنه فعلاً مقتنع إن أنا موهوبة وإن إحنا لازم



نتقابل قريب علشان نشوف إيه اللي ممكن يتعمل. هو بعد كده قال لمروان إن بعد الفيلم ما يخلص لازم نعمل عرض خاص ونتقابل كلنا تاني. مروان قال له طبعًا. بعد كده سلم علينا ومشى. أنا دلوقتي أعدت في الأوضة مش مصدقة إن التسجيل يخلص، إن التصوير حيداً الأسبوع الجاي، إن الفيلم المفروض يخلص مونتاجه ويبقى جاهز للعرض في خلال شهر. وأكثر حاجة مش مصداقة إني قابلت كمال رفعت تاني.



أنا لغاية دلوقتى ما قلتش لليلى إني شوفت كمال رفعت. أنا صحيح ما شوفتهاش ولا كلمتها من وقتها، بس أنا كان المفروض أقول لها. هي طبعا زماها عرفت من مروان. أنا أشك إن في أي أخبار عن كمال ما بتوصلهاش، بالذات من حد قريب منها زي مروان. أنا مش عارفة أنا ليه بافكر كثير في الموضوع ده. في الحقيقة مافيش حاجة حصلت، مش أوي. أنا قابلت كمال رفعت وسلمت عليه، بس كده. بس الحقيقة إن مقابلته أثرت عليا أكثر من ما أنا كنت أتخيل. هو انطبع في ذاكرتي، صوته ووشه وحركاته. أنا عارفة إن أنا مش معجبة بيه إعجاب حقيقي، بس هي أول مرة في حياتي أقابل رجل جذاب بالشكل ده، جاذبية طبيعية ومباشرة. ليلى عندها حق تعجب بيه، حتى هوسها ابتديت أفهمه.

\*\*\*\*

النهارده كان عيد ميلادي. بقى عندي ١٨ سنة. بقيت حرة نفسي، يمكن في بلاد كثير في العالم، ١٨ سنة سن معناه النضوج، الحرية واتخاذ قرارات. أنا فعلا حاسة إني كبرت، بس عارفة إن أهلي لسه بيعتروني طفلة وما ينفعش آخذ قراراتي بنفسي، على الأقل مش كلها. أنا ساعات باحس إني نفسي



أكون ولد. لو كنت ولد وعندي ١٨.. إوعى! كان زمان  
الدنيا كلها مفتوحة لي. في مصر بالذات كل حاجة كانت  
حتبقى أسهل. كل حاجة أسهل للولاد في مصر. ليه مش  
عارفة. غالبًا عمر ما حد حيعرف.



وأنا في النادي النهارده حسيت بحاجة غريبة جدًا. أنا كنت بأتمرن في البيسين ومعايا حوالي خمسة كمان في المكان كله. النهارده كان وسط الأسبوع فالبيسين كان فاضي. بعد ما خلصت تمرين وسندت على الحرف علشان آخذ نفسي، حسيت إن في حد بيراقبني. أنا بصيت حواليًا وما شوفتش حد بيصلي، بس الإحساس ما وقفش. أنا كنت حاسة إن في حد مركز عليًا، عينيه بتراقبني. ازاي كنت متأكدة، ما اقدرش أقول، بس هو كان إحساس مخيف وأنا عارفة إني مش حانساه. بعد ما خرجت من النادي قررت أتمشي شوية قبل ما آخذ تاكسي، والغريب إن الإحساس فضل موجود. طول ما أنا ماشية كنت حاسة بعينين بتراقبني. كنت باتدور كل شوية وبأبص ورايا بس ما لقتش حد. أنا دلوقتي وأنا أعددة في بيتي في أمان ابتديت أشك إن اللي حصل ده كان حقيقي. يمكن كانت تهيزات. بس لو هي كانت تهيزات أنا ليه فاكرها بوضوح لغاية دلوقتي وقادرة أكتب عنها بالتفصيل؟



ليلي لسه قافلة معايا وقالت لي إن مروان قال لها إن أنا كنت هايلة في التسجيل وأعد يشكرها على إنها عرفتنا على بعض، فقالت له إنها عندها عين للموهبة. بعد كده أعدت تتكلم معايا شوية عن حاجات كثير وسألتني عن أخباري، بس ما جابتش سيرة مقابلي لكمال. هل مروان قال لها؟ هل ممكن يكون ماقالهش؟ ليه؟ هل هي عارفة بس مش راضية تقول لي علشان عايزاني أقول لها أنا الأول؟ يمكن. المهم إن المكالمة انتهت من غير ما حد فينا يجيب سيرة الموضوع. أنا دلوقتي ضميري مأثبي وحاسة إني غلطانة. نفسي أكلّمها وأقولها إني قابلته. بس أنا ليه حاسة بالتأنيب؟ أنا ما عملتش حاجة غلط ومقابلي لكمال كانت بالصدفة. هل هي ممكن فعلاً تضايق لو عرفت إن أنا قابلته وما قتلهاش؟ ولأ هي حتضايق لمجرد إن أنا قابلته؟



الامتحانات قربت وأنا خائفة. أنا حاولت أذاكر على أد ما أقدر بس ساعات بأحس إني بأذاكر حاجات عمري ما محتاجها في حياتي أبدًا. مش قصدي زي المدرسة لما المنهج كان محشي بمعلومات ملخطة وفارغة لدرجة إن حتى وإحنا أطفال كنا عارفين إن أغلبها مالوش لازمة، لأ. أنا ساعات بأحس إن أنا بأذاكر مواد غريبة مش بتاعتي ولا عمري حاستعملها لأنني حاسة إني عمري ما حاشتغل بالشهادة دي. طبعًا ده غالبًا مش حقيقي، بس الإحساس ده ساعات يبقى قوي جدًا لدرجة إني وسط ما أنا بأذاكر ساعات باضطر أقف وأسأل نفسي: "إيه اللي أنا باعمله ده". بس أنا لازم أحاول أركز أكثر وأجهز نفسي للامتحانات. أهلي ممكن ينهاروا لو سقطت في أول سنة.



النهارده حسيت بنفس الإحساس تاني، إن أنا متراقبة. أنا كنت في النادي، أعدت لوحدي باذاكر، الدنيا كانت يا دوبك ابتدت تليل والحنة اللي أنا كنت أعدت فيها بتبقى فاضية أغلب الوقت علشان كده أنا باجي هنا لما باكون عايزة أذاكر. النهارده حسيت إن أنا مش لوحدي، بصيت حواليا وما لقتش أي حد أعد معايا. الجنينة كلها كانت فاضية، بس كنت حاسة إن في حد واقف بعيد بيراقبني. قمت من مكاني وروحت أعدت في الرجولا بالرغم من إنها مليانة ناس وأنا ما باعرفش أذاكر هناك. في الأول برضو حسيت إن في حد بيراقبني، ولكن بعد دقيقة الإحساس اختفى فجأة كأنه كان إرسال واتقطع. أنا مش قادرة أفهم أنا ليه باحس بكده وازاي أنا متأكدة إن الإحساس ده معناه إن أنا متراقبة. بس أنا فعلاً متأكدة. من غير ما أشوف أو أسمع اللي بيراقبني أنا عارفة إنه موجود.



أنا بقي لي أربعة أيام باحي النادي وباذاكر والحمد لله مش  
باحس بحاجة. يمكن فعلًا كان بيتهيألي. بس وقتها الإحساس  
كان حقيقي، كنت متأكدة إني متراقبة. المهم إن أنا دلوقتي  
حاسة إن أنا في أمان وإني عارفة أذاكر. لو كان الإحساس ده  
استمر ما كنتش عارفة حاعمل إيه.



أنا دلوقتي في البيت باذاكر. أنا رجعت من النادي من ساعتين. أنا متأكدة. وأنا باذاكر، فجأة افكرت حاجة، أو بمعنى أصح افكرت إن أنا ناسية حاجة. أنا فاكرة إن أنا خلصت الجامعة، رجعت البيت أتغدى وبعد كده نزلت أروح النادي علشان أذاكر. أعدت أذاكر من الساعة خامسة لسابعة. أنا رجعت البيت واتعشيت وبعد كده ابتديت أكمل مذاكرة. بس أنا دلوقتي افكرت إن أنا لما رجعت البيت ماما سألتني أنا تأخرت ليه فقلت لها إن أنا ما تأخرتش ولا حاجة وإن الطريق كان وحش. وأنا باكل بصيت على الساعة ولقيتها تسعة إلا تلت. أنا مشيت من النادي الساعة سابعة. الطريق كان زحمة، يمكن؟ بس المشكلة إن أنا مش متأكدة. أنا مش قادرة أفكر إيه اللي حصل بالظبط بعد ما خرجت من النادي. أنا فاكرة إني ركبت تاكسي، بس ركبته إمتى؟ الساعة سابعة أول لما خلصت مذاكرة ولا ركبته بعد كده؟ مش قادرة أفكر. ولو أنا فعلاً ركبته الساعة السابعة يبقى ليه وصلت البيت متأخر كده؟ الطريق حتى لو كان زحمة ما كانش حياخد ساعة ونص، مستحيل. هل أنا فعلاً فاكرة صح؟ هل أنا خلصت مذاكرة الساعة سبعة؟ ولو ده حقيقي، يبقى إيه اللي حصل بعد



كده؟ ليه أنا مش فاكرة؟ ازاي أنا مش فاكرة؟ أنا لازم أبطل أفكر بالطريقة دي. أنا مش علشان حصل لي الموضوع ده مرة يبقى أنا حافكر نفس التفكير كل ما حاتعب أو أنسى حاجة. أنا باذاكر كتير أوي وأبتدا يجيلي إرهاق. هو ده السبب. مش حتبقى أول ولا آخر مرة أنسى فيها حاجة من التعب. أيوة، هو ده السبب. أنا متأكدة.



أنا حلمت حلم غريب أوي النهارده لما نمت شوية الظهر.  
 حلمت إن أنا أعددة على ركبي في مكان مهجور وضلمة. ما  
 فيش حواليا أي حاجة. من بعيد أوي شايفة عمارات ومباني  
 وسامعة صوت مكن. في الحلم كنت لابسة فستان سواريه  
 إسود وكنت باعيط. ما كنتش قادرة أسيطر على جسمي، ما  
 كنتش قادرة اتحرك، كنت مشلولة. وبعد كده حسيت إن في  
 حد واقف ورايا وإنه لو طلب مني أي حاجة حانفذهها لأني  
 تحت سيطرته. فجأة اترفعت من على الأرض كأني عروسة  
 مصنوعة من الخشب، كأني وزني خفيف. بصيت على الأرض  
 وشوفت إن تحت مني في نار وإها عمالة تكبر. قبل ما تلمس  
 رجلي صحيت. أنا دائما بيحيلي أحلام غريبة وقت  
 الامتحانات. من وأنا صغيرة ودائما باحلم بكوابيس لما  
 الامتحانات بتقرب، أنا متعودة. بس الكابوس ده كان غريب،  
 والغريب فيه إن حسيت وكأنه ذكرى، حاجة حصلت خلاص  
 وإن عارفة المكان المهجور ده. طبعا ده مش حقيقي. أنا عمري  
 ما شرفت المكان ده قبل كده. حاجة غريبة فعلا. بس هو ده  
 معنى كلمة أحلام. حاجات الواحد بيشفها وهو نائم وبالتالي  
 مش حقيقية. بس ساعات بتبقى حقيقية. ساعات.



الامتحانات خلاص قريت جدًا. العد التنازلي بدأ وأنا ما بقاش عندي وقت أعمل أي حاجة غير إني أذاكر. أنا بقيت باروخ النادى مرة واحدة في الأسبوع وبقي لي أكثر من أسبوع ما اتمرنش. حاسة إن عضلاتي ابتدت ترييح تاني. أنا لازم أحاول أروح يوم الجمعة. التمرين حيساعدني أأخذ (Break) وأهدي أعصابي شوية.



#### ٤ يناير

نفس الحلم تاني. هو هو بنفس التفاصيل. الفرق الوحيد إن  
المرّة دي النار لمست رجلي. بس أنا ما حسّتش بحاجة. كنت  
شايقة النار بتحرق الكولون وتلمس جلدي بس برضو ما  
حسّتش. الحلم وقف هنا وكملت نوم.



أخيرًا الأجازة. أنا عمري ما ذاكرت بالشكل ده ولا حتى في ثانوية عامة. مش عارفة ليه، بس أنا تعبت أوي علشان أعرف أحفظ المواد دي. أنا بجد أرجو إن نمري تبقى كويسة. أنا مش عارفة حاكم الكلية المهية دي ازاي لو بعد كل المجهود ده ما جبتش نمر كويسة. أنا لا يمكن أقدر أعمل أكثر من كده.

مروان كلمني وقال لي إن الفيلم خلاص على وشك إنه يخلص وإنه قريب حيعمل عرض خاص لكل اللي شاركوا في الفيلم. أنا مش قادرة أستنى. نفسي أشوفه أوي. الحقيقة إني نفسي أمثل تاني. يا ترى في أي حاجة ممكن أعملها في الأجازة دي؟ أنا حاسأل مروان، يمكن يعرف أي حاجة ممكن أشارك فيها قبل الأجازة ما تخلص. يا ريت.



النهارده قابلت باكينام وقالت لي خير مفاجئ جدًا. عمر  
 حيطيها. أنا عارفة إن هي وعمر متصاحبين بقى لهم فترة  
 وإهم مندجيين مع بعض جدًا، بس أنا ما كنتش متخيلة إهم  
 فعلًا ييجبوا بعض. أنا فرحانة لبكينام أوي، بس هو فعلًا خير  
 مفاجئ. ما كنتش متوقعاه خالص. أنا المفروض كنت أتوقعه،  
 باكي أقرب صاحبة ليا بجانب نيفين، يمكن أكثر من نيفين  
 كمان لأن باكي صاحبي من وإحنا صغيرين لغاية دلوقتي.  
 نيفين كانت برًا لمدة ست سنين. أنا المفروض كنت آخذ بالي  
 إن علاقتها بعمر اتغيرت وقلبت جد بالرغم من إهم بقى لهم  
 أقل من سنة يعرفوا بعض. بس هي باكي برضو مش متكلمة  
 أوي، على الأقل عن نفسها. أنا قابلته مرتين ثلاثة وحسيت إنه  
 ولد ظريف وطيب، بس خطيب باكينام؟ ما كنتش ممكن  
 أفكر. عمر قرر إنه ياخذ الخطوة الأخيرة ويقابل أهلها، غالبًا  
 الأسبوع الجاي. ربنا معاه. هما أهل باكي طيبين، بس باباها  
 عنيد جدًا ومش عارفة حيقى رأيه إيه في عمر. هو أكبر من  
 باكينام بثلاث سنين وفاضل له سنة في الجامعة، بس هو بيشتغل  
 مع باباه في شركته، وأذكى وأنصح من أغلب الولاد اللي في  
 سنه. أدينا حنشوف.



قابلت ليلي ومروان النهارده. كنت أعدده على أعصابي طول الوقت، خايفة إن وإحنا أعددين مروان يقول لها فجأة على حكاية مقابلتي لكمال. بس ليلي كانت على طبيعتها جدًّا وما كانش شكلها مخيبة عني حاجة. أنا دلوقتي متأكدة إنها ما تعرفش وده اللي خلاني أقرر إني أقول لها. أنا مش عايزة حاجة تافهة زي دي تتسبب في مشاكل ما بيني وما بينها. أنا حاكلها دلوقتي وأقول لها.

\*\*\*\*

ليلي ماتت على روحها من الضحك وقالت لي إنها فعلًا ما كانتش تعرف وإن أنا طيبة أوي زيادة عن اللزوم. هي قالت لي إن من الواضح إن أنا لسّه مش عارفها كويس. قالت لي إنها عارفة إن كمال ده ابن للذينة وقدرته على تنويم أي بنت مغناطيسيًا مالهش حدود. هي قالت لي إنها مبسوطه إن أنا صريحة معها وإن مشاعرها بتفرق معايا للدرجة دي، وقالت لي إن على الأقل أنا دلوقتي فهمت هي حاسة بإيه. ضحككت وقلت لها إن أنا عندي فكرة. وفي الآخر قالت لي إنها ما بتغيرش لأن كمال رفعت مش بتاعها، على الأقل لغاية دلوقتي! أنا مش قادرة أوصف أنا مستريحة أد إيه. ليلي إنسانة غريبة،



ملينة بالمفاجآت. أنا ما كنتش أتخيل إن ده حقيقي رد فعلها،  
بس أنا برضو غلطانة وكان المفروض أقول لها من قبل كده  
وأخلص من القصة دي. بس أنا ما كنتش أقدر أعرف هي  
حتفكر ازاي. أنا دلوقتي عرفت.



مروان كلمني وقال لي إن العرض الخاص للفيلم يوم الأربعاء  
 الجاي. الجاي ده على طول، كمان ثلاث أيام! حيقى في قاعة  
 عرض صغيرة في أستوديو في الهرم. أنا حاسة إني حانفجر من  
 التشوق. أول فيلم أمثل فيه في حياتي! يا ترى حيقى إحساسي  
 إيه وأنا أعددة وسط الناس وباتفرج وباسمع صوتي. هل حد  
 حيعرف إنه أنا؟ طبعا لا. أنا قلت لمروان يشيل اسمي من  
 التترات، وهو في الآخر وبعد كلام كثير وافق. هو رأيته إن  
 الناس كلها المفروض تعرفني، بس أنا شرحت له موقفني تاني  
 بالرغم من إن أنا نفسي بدأت أزهد من الأعذار دي. بس أنا  
 عارفة إن أنا لسه ما اقدرش أعمل حاجة. في المستقبل.. يمكن.  
 ثلاث أيام!



النهارده قابلت نيفين وباكي في كافية في الزمالك. بعد كده  
 اتمشينا شوية في شارع ٢٦ يوليو. عدينا من جنب مدرستنا  
 القديمة (القديمة؟ إحنا سينا المدرسة من أقل من سنة!) وفجأة  
 افكرت حلمي القديم بتاع المانيكان والشارع الضلمة. أنا  
 كنت فاكرة إن الشارع اللي في الحلم يبقى الشارع الجاني اللي  
 إحنا كنا دائماً بنمشي فيه علشان نختصر الطريق ونطلع على  
 ٢٦ يوليو، بس أنا لما شوفته النهارده اتأكدت إن الشارع اللي  
 في الحلم شبهه بس مش هو. الشارع اللي في الحلم مختلف،  
 مش عارفة ازاي، بس هو مختلف. هو في الآخر جزء من حلم،  
 بس أنا فاكرة شكله كأني مشيت فيه فعلاً، في الحقيقة. بس لو  
 مش هو ده الشارع، يبقى ليه أنا لسه حاسة إنه شكله مألوف  
 بالنسبة لي؟



أنا عازية أكتب كام حاجة من الحاجات اللي حصلت النهارده. أنا لو حاولت أكتب كل حاجة حاخلص النوتة دي كلها وهي أصلًا ما فاضلش فيها ورق كثير (أنا مش مصدقة إني كتبت كل ده!) أنا شوفت الفيلم وعجبتني جدًا. أنا أول مرة في حياتي أتفرج على فيلم على شاشة سينما وأحس إني جزء منه، إني واحدة من الناس اللي عملوه. الفيلم إخراجته خطير، التمثيل فيه تحفة، ومروان أضاف مشهدين ما كانوش موجودين في السيناريو، بس أنا دلوقتي مش متخيلة الفيلم من غيرهم. أما أدائي فهو أحسن بكثير من ما أنا كنت متخيلة وما كنتش عارفة إن الـ (Voice Overs) بتاعتي حتبقى مهمة للفيلم بالشكل ده، بالذات آخر جملة، لما باقول اسم القاتل، وبعد كده بيحصل (Fade Out) والفيلم بيخلص. كل الحاضرين صقفوا والناس كانوا كثير، أكثر بكثير من ما أنا كنت متخيلة حيحضروا العرض. بجانب إن القاعة ما كانتش كبيرة، فالمكان كان شكله زحمة جدًا. الحاجة الوحيدة اللي كانت قلقاني طول الوقت إن كان فيه اتنين صحفيين موجودين في العرض وكنت خايفة إهم يعرفوا إن أنا شاركت في الفيلم. مروان قال لي إهم فعلًا سألوا وإنه قال لهم إن اللي عملت



الـ (Voice Over) ممثلة كبيرة ومش عايزة حد يعرف هي مين علشان متسرقش الأضواء من باقي الممثلين وإن هو شاكر جدًا لتواضعها. ضحككت وشكرته جدًا. ليلي كانت هناك ونيفين. نيفين عجبها الفيلم جدًا و قالت لي إنها ما كانتش عارفة إن أنا باعرف أمثل كويس كده. قلت لها إن التمثيل قدام الميكروفون حاجة وقدام الكاميرا حاجة تانية خالص، وعلى الأقل أنا دلوقتي عرفت إني عمري ما حادئتن لأني لازم أحافظ على الحاجة اللي ممكن تأكلني عيش في المستقبل. نيفين ضحككت و قالت لي إنها متأكدة إن وشي ممكن يأكلني عيش برضو. ليلي وقفت معايا أنا ونيفين شوية، بس هي كانت مشتتة جدًا لأن كان في ناس كثير من أصحابها حاضرين، بس هي قالت لي إن الفيلم عجبها جدًا وإنها طول عمرها بتحب أفلام جرائم القتل، وقالت لي إن أدائي كان هائل. بعد كده اختفت لمدة نص ساعة وبعد كده ظهرت فجأة وشدتني من دراعي وقالت لي إن كمال رفعت وصل. ضحككت لما شافت وشي بيحمر وبان عليا التوتر، فسألت إذا ده معناه إني مش عايزة أسلم عليه، فقلت لها إن أنا مش حتفرق معايا وإن الحقيقة إن أنا فعلاً ما اعرفوش، بجانب إن هو بيؤثرني. فقالت لي إن مافيش ست في كامل قواها العقلية ما بتتوترش قدامه وإن ده رد فعل طبيعي لواحد زي كمال رفعت اللي هو عبارة



عن "كتلة جنس متحركة". ضحككت وقلت لها توطي صوتها، بس هي كانت مشيت خلاص ورايحة ناحيته. أنا شوفتها بتسلم عليه تقريباً بالعافية وهو ابتسم لها وبعد كده قال لها حاجة، فيان على وشها إنها مستغربة جداً وبعد كده ادّورت ناحيتي وابتسمت وكمال رفعت بصلي وابتسم. وفجأة لقيتهم جاينين ناحيتي. أنا وقفت في مكاني وبصيت حواليا وكأني في قفص مش عارفة أخرج منه. شوفت نيفين واقفة بعيد عني بتكلم حد تعرفه وكنت عايزة أنادي عليها علشان تبقى معايا (قال يعني ده كان ممكن يساعدي، وبعد كده ليلي وكمال بقو قدامي. ليلي كانت نظرها ليا غريبة، فيها حبت وتشوق وتوتر. كمال رفع إيديه اليمين وسألني حاجة ما سمعتهاش من الدوشة، بس أنا سلمت عليه وقلت له إن أنا كويسة، على أمل إن ده يكون الرد الصبح على السؤال اللي أنا ما سمعتوش. هو قال لي إن الفيلم عجبه جداً وإن مروان كان عنده حق لما قال إن أنا موهوبة جداً ومميزة وإن أدائي أضاف كتير للفيلم. وبعد كده قال لي إن الخطوة الجاية لازم تكون دور قدام الكاميرا ودور مش صغير. أنا شكرته جداً وقلت له إن أنا عايزة آخذ الأمور بالراحة واتعود على المجال بالتدريج، فقال لي إن ده كلام جميل ومعقول جداً بس ما ينفعش إن واحدة موهوبة زيي تاخذ الأمور بالراحة زيادة عن اللزوم لدرجة إن أنا أضيع فرص



ممكن ما ترجعش. ليلي قالت إنه عنده حق وإني لازم أبتدي أفكر في المستقبل. بعد كده ليلي سألته إذا كان يعرف فرص ليا وقال لها إنه طبعا يعرف فرص كثيرة وإن كل المطلوب مني إني أوافق. أنا اتكسفت جدًّا وما بقيتش عارفة أقول إيه. ليلي كان واضح عليها إنها ابتدت تزهد من الحوار، فسألت كمال إذا كان رايح حنة ثانية بعد كده، فقال لها إنه لسه ما قررش حيروح فين. قبل ما يجيلها فرصة تتكلم تاني، حد نادى عليها وراحت تسلم عليه من غير ما تبصلي خالص. كمال قرب مني وقال لي إنه زي ما قال لي قبل كده في الأستوديو هو نفسه يقعد معايا على انفراد علشان نتكلم عن مستقبلي وعن حاجات ثانية كثير. أنا لو كنت سمعت الكلام ده من أي حد تاني غيره كنت حاقول له لأ، لكن لكمال رفعت ما قدرتش أقول حاجة غير آه. خد غمري وقال لي إنه حيكلمني قريب وابتسم ابتسامة من ابتساماته اللي.. ما تتوصفش ومشني. نيفين جات ووقفت معايا أول لما مشي وقالت لي إنها كانت مكسوفة تتدخل ما بينا، فقلت لها إن أنا كان نفسي أعرفها بيه وهي قالت لي إنه فعلاً جذاب جدًّا وإنه من الواضح إنه معجب بيا. في اللحظة دي استغربت كلامها جدًّا لأني ما كانش عندي الجرأة إني أفكر إن حاجة زي كده ممكن تحصل. كمال رفعت يعجب بواحدة زيي؟ طالبة في الجامعة؟ بنت ما عندهاش



خبرة في الحياة، مش زي "الستات" الصواريخ اللي هو بيمشي  
معاهم؟ الموضوع كله كان لا يصدق. قبل ما نيفين تكمل  
كلامها، ليلي ظهرت تاني وقالت لي إن كمال رفعت مشي  
وسألتني إذا كان قال لي هو رايح فين بعد كده وقلت لها لا.  
ليلي استغربت ردي وقالت لي إنها افكرت إنه قال لي. أنا  
كنت ابتديت اتضايق من الكلام عنه مع ليلي، لأن بالرغم من  
إنها ما كانش باين عليها إنها متضايقه، أنا حسيت إنها على  
الأقل زهقانة ومشتتة كأنها بتفكر في حاجة شغلها جدًا. هي  
بعد كده قالت لي إنها حترّوح وإنها ممكن توصلني، فنيفين قالت  
لها ما تتعبش نفسها وإنها معاها السواق. سلمت علينا ومشيت  
وبعد كده أنا سلمت على مروان واتقفت معاه إن إحنا نتقابل  
قريب. بعد كده ركبت مع نيفين وروّحت. وصلت البيت  
الساعة تسعة ونص، وحظي إن أهلي كانوا لسه ما رجعو  
من خروجتهم لأن أنا كنت فعلًا محتاجة أبقى لوحدي وأفكر  
من غير ما حد يدخل عليّ كل عشر دقائق ويسألني أسئلة  
ردت عليها مليون مرة قبل كده. أنا أعدت في الصلاة، مكان  
نادرًا بيبقى فاضي أو هادي، وأعدت أفكر. أنا حاعمل إيه  
دلوقتي؟ أنا النهارده اتأكدت إن الحاجة الوحيدة اللي ممكن  
تسعدني في حياتي إني أبقى ممثلة. لو ده الإحساس اللي أنا  
حسيت بيه من أداء بصوتي بس، يبقى إيه اللي ممكن أحس بيه



لو مثلت بجذ، بوشّي، بجسمي، بكلي؟ إني أقف قدام الكاميرا  
أو على المسرح، أعيش شخصية جديدة، أتخيل ازاي هي  
بتتحرك وبتفكر وإيه ردود فعلها للشخصيات الثانية، بتلبس  
إيه، بتسرح شعرها ازاي؟ ده عالم أنا نفسي أغرق فيه، أعيش  
فيه، أتعب فيه. أنا من وأنا صغيرة وأنا عارفة الحقيقة، بس أنا  
بأتجنبها بقى لي أكثر من عشر سنين. هل أقدر أتجنبها أكثر من  
كده؟ ليه أتجنبها أصلاً؟ علشان أهلي ولّا علشان أنا خايفة؟ أنا  
فعلًا خايفة من أهلي ومش عارفة ممكن يعملوا إيه لو قلت لهم.  
ممكن يقعدوني في البيت؟ مش للدرجة دي، بس حيقفوا في  
طريقي في كل خطوة وحيدفقوا على كل حاجة باعملها وكل  
حتة باروحها ومعاملتهم حتتغير. أنا ما أقدرش أسيب البيت.  
أنا مش عايشة في أوروبا. بنت في سني حتروح فين؟ أنا  
ماعيش فلوس ولسّه صغيرة أوي على إن حد يرضى يشغلني  
معاه في أي حاجة، وحتى إذا اشتغلت، الفلوس مش حتكفي إن  
أنا أقدر أعيش لوحدي. ولو عشت لوحدي حابقي دائماً  
معرضة للقرص وكلام الناس والمعاكسات وقلة الأدب. أنا  
ساعات باحس إن أنا في سجن وإنه مش سجن ستات، لأ، إن  
أنا مرمية في سجن أغلبه رجاله وإن الحراس سايينهم يعملوا  
إليي هما عايزينه في المساجين البنات. اللي عايز يقول حاجة  
يقولها، اللي عايز يمسك بنت يمسكها، اللي عايز يعمل أكثر من



كده، يحاول، يمكن ما يقدرش، بس على الأقل حياخد فرصته.  
أنا مش عارفة أفكر ازاي أو أروح فين، بس أنا لازم أفكر  
وأقرر حاسم إيه. أنا مش عايزة دي تبقى حياتي. ده حيبقى  
حرام.



قابلت نيفين النهارده في النادي وقالت لي الخير. باباها غير رأيه في موضوع فرع شركته اللي في مصر وعازي يرجع بلجيكا بأسرع ما يمكن. نيفين متضايقه جدًا وبتقول إنها كانت ابتدت تتعود على مصر وعلى الجامعة وإنها دلوقتي مطلوب منها إنها ترجع لبلجيكا تاني وتقدم في جامعة جديدة وتسبب مصر. هي لازم تقدم بسرعة علشان تلحق الـ Summer Courses، وإنها في كل الحالات خسرت ترم لأنها ما كانتش لاقية الـ (Major) اللي هي عايزاه في مصر فدخلت (Anthropology)، وبسبب القرار ده لما حترجع تاني بلجيكا وحتدخل الـ (Major) اللي هي كانت أصلًا عايزاه، أغلب المواد اللي خدتها في مصر مش حتنقلها. أنا حاولت أطمئنها وأقول لها إن هي ما لحقتش تأعد في مصر كثير وإن ده ممكن يكون للأحسن علشان النقلة ما تبقاش صعبة عليها. وقلت لها إنها حتوحشني جدًا. هي ابتدت تعيط وصعبت عليا جدًا. أنا مسكت نفسي لغاية لما هي مشيت وبعد كده أعدت لوحدي في الجينة وأعدت أعيط لغاية لما الناس ابتدت تتفرج عليا، فمشيت.

\*\*\*\*



المرّة دي أنا متأكّدة إن في حاجة غريبة حصلت لي. أنا سبت النادي الساعة ستة، أول لما الدنيا ضلّمت. أعدت أتمشي شوية وبعد كده ركبت تاكسي الساعة سبعة إلا ربع. لما وصلت البيت الساعة كانت ثمانية ونص. أنا مش فاكّرة أنا روحت فين قبل ما أوصل البيت وإذا كنت روحت أي حتة من أساسه. بس أنا وصلت البيت الساعة ثمانية ونص وأنا مش فاكّرة إيه اللي حصل في الساعة ونص دول. ازاي أنا مش فاكّرة؟ دي حاجة خطيرة جدًّا، ممكن يكون حد عمل فيا حاجة، ممكن يكون حد خدّرتي. بس دي مش أول مرّة تحصل. هل ممكن يكون حد خدّرتي وخطفني مرتين؟ بس لو كان عمل فيا أي حاجة كنت حاعرف. أنا نمت على نفسي في الحمام ومتأكّدة إن محدّش عمل فيا أي حاجة. ما فيش طعم غريب في بقي أو آثار إبر في دراعي أو في أي حتة تانية في جسمي. أنا حاسة إني كويسة مش داخّة. إيه اللي ممكن يكون حصل؟

\*\*\*\*

أنا سألت ماما إذا كانت فاكّرة أنا رجعت الساعة كام النهارده وقالت لي ثمانية ونص. أنا حسّيت إنها استغربت السؤال بس هي بصّلتني وما علقتش. هي غالبًا مقتنعة إنها تقلّبات مزاجية بتاعة بنت مراهقة أو حاجة زي كده. بس هي



قالت لي حاجة ثانية فاجتتني جدًّا. قالت لي إن أنا كلمتها الساعة سبعة وقلت لها إن أنا قابلت حد في النادي من فريق السباحة وحاقعد معاه شوية وعلشان كده حاتاخر. الغريب إنها لما قالت لي كده أنا فعلًا ابتديت أفكر إن أنا قابلت حد في النادي بس ما قدرتش أفكر مين. وقتها عرفت إن أنا ممكن يكون عندي مشكلة في محي وإني فعلًا لازم أعمل الرنين اللي طلبه الدكتور عزمي. الموضوع ما ينفعش يستنى أكثر من كده. أنا خايفة.



## ٥ فبراير

عملت الرنين من غير ما حد يعرف. الدكتور عزمي قال لي على مركز أشعة قريب مني وخذت ميعاد وروحت. الرنين كان غالي جدًا وخذ جزء كبير من الفلوس اللي أنا كنت محوشاها، بس أنا ما كنتش عايزة أقول لأهلي وعلشان كده مأخذتش منهم فلوس. الرنين نفسه كان مختق وحسيت إني راقدة في تابوت. لبسوني سماعات علشان الطنين اللي بيطلع من المكنة، بس برضو كنت سامعة الصوت البشع ده. أنا حسيت إنه خد وقت طويل أوي، ساعة على الأقل، بس هو في الحقيقة خد وقت أقل من كده بكثير. أنا دلوقتي معايا نتائج الفحص والمفروض أقابل الدكتور عزمي بعد بكرة. ربنا يستر.



كمال كلمني النهارده وقال لي إنه عايز يقابلني بكرة في مطعم (Le Jardin) في الزمالك. أنا ما عرفتش أقول إيه وأصر إن أنا لازم آجي وأقابله وإنه مطعم تحفة وأكله خطير. قلت له إن أنا يمكن أحيب معايا صاحبي وقال لي إن أنا حرة بس إنه يفضل يقابلني لوحدي وإنه حيستنائي في المطعم الساعة سبعة. أنا كان ميعادي مع الدكتور عزمي الساعة أربعة ونص، وكنت عارفة إنه حيبقى صعب أوي إن أنا ألحق الميعادين، بس وافقت. بعد ما قفلت معاه أعدت أفكر أنا ازاي وافقت وازاي حاقول لليلي وإذا كنت حاقولها أصلًا.



أنا لحقت الميعادين. أول ميعاد، مع الدكتور عزمي، كان كويس أوي. هو طمّنى إن الرنين المغناطيسي بياكد إن أنا ماعنديش حاجة في المخ وإنه بالرغم من إنه يفضل إن أنا أعمل (CT Scan) زيادة تأكيد، هو مقتنع إن أنا مخي سليم وإن المشكلة نفسية. هو قال لي إن بالرغم من إني بأقول إن أنا كويسة، إني أكيد مضغوطة وتمر بفترة صعبة. هو ضغط عليا لغاية لما اعترفت إن أنا فعلا تمر بفترة صعبة وإني عندي قرارات كثيرة لازم أخدها، بجانب إن صاحبي نيفين اللي فقدتها مرة قبل كده لما سافرت من ست سنين، حافقدها تاني لما ترجع بلجيكا في خلال أسابيع. هو كان باين عليه إنه فعلا متفاجئ وإنه ما سمعش الخبر ده عن جيرانه. أنا حسيت إن أنا قلت حاجة ما كانش المفروض أقولها بس هو طبيب نفسي والمفروض إن كلامنا مع بعض بيفضل سر. أنا باثق فيه. هو بعد كده قال لي إني لازم أهدي من نفسي وما أرهقش أعصابي لأني من الواضح إني حساسة جدًا وإني في سن صعب مليء بالتغيرات واتخاذ القرارات، بس في نفس الوقت سني يسمح لي إني أستمتع بالحياة وبوجودي مع الناس اللي باحبهم وإن دلوقتي عندي حرية يمكن ما تبقاش موجودة في المستقبل. أنا ضحكت و قلت له إن أنا مقتنعة إن الحرية يمكن تيجي في المستقبل بس هي أكيد مش موجودة دلوقتي. هو فهم قصدي وقال لي إن الإنسان دايماً عنده حرية ولكن المشكلة إنها ساعات



بيبقى تمنها غالي، وإن دلوقتي أهم حاجة هي راحة بالي وسعادتي، وإن القرار اللي لازم أخده والمشاكل اللي لازم أواجهها وقتهم جه. قال لي إني لازم أتخلص من الأعباء دي وأكمل حياتي. كتب لي دواء مهدئ، نفس الدواء اللي كتبه ليا المرة اللي فاتت، وقال لي إنه عارف إنه قال لي عليه قبل كده بس إنه المرة دي عايزني أخده فعلاً، وضحك. أنا كمان ضحكت وحسيت إن الدكتور عزمي غريب جداً لأنه رجل كبير، أد بابا في السن، ولكن مختلف تماماً في طريقة تفكيره. طبعاً هو دكتور وبابا مجرد مهندس معاه بكالوريوس، بس مش هو ده سبب الاختلاف ما بينهم. سبب الاختلاف هو إن الدكتور عزمي يسمع وينصح بناءً على اللي سمعه، يفهم موقعي. بابا ينصح وخلاص، نصايحه أوتوماتيك، كلها شبه بعضها، ينصح من غير ما يسمع، يفرض خبرته على حياتي من غير ما يفهم مشاكلي. علشان كده أغلب نصائحه ما بتنفعش.

بعد كده ركبت تاكسي ونزلت الزمالك. وصلت بعد ميعادي بعشر دقائق. أول لما قربت من مدخل المطعم حسيت إني مش لابسة كويس وإني أصغر واحدة داخله المكان. الرجل اللي واقف برّا سألني عن اسمي وقلت له إني مع كمال رفعت فابتسم وشاور لي إني أمشي معاه وورائي طرابيزة كمال. هو كان أعد لوحده، مديني ضهره، بيشرب حاجة في كاس (بعد



كده عرفت إنه نبيذ أبيض)، ولما روحت له ابتسم ابتسامة جميلة وقام بسرعة علشان يشدلي الكرسي قبل ما الجرسون يلحق يعمل حاجة. بعد كده أعد في مكانه وسألني إذا كنت عايزة نبيذ وقلت له إن أنا ما باشربش، فشاور للجرسون وسألني تاني أحب أشرب إيه. وأنا بأقول عايزة عصير ليمون، حسيت إني مكسوفة أوي كأني طفلة في بار. كمال سألني إيه أخباري وإيه خطتي للمستقبل. قال لي إن هو ما كانش بيهذر لما قال لي إنه عايز يساعدي. أنا شكرته جدًا وقلت له إن أنا لسه ما عملتش حاجة وما عنديش خبرة، فقال لي إن عذر الخيروا ده أهم عذر عند الناس الواقعين الجبناء. قال لي إن مش علشان الواحد بيشتغل عشر سنين في نفس المجال معناه إنه خبير فيه، بالعكس، ممكن يكون حمار بس حظه حلو إنه ما اترفدش طول السنين دي وإن مديره غبي أوي لدرجة إنه ما أخذش باله إن عنده واحد أعد عنده في الشركة طول المدة دي وما يفهمش حاجة، ويمكن المدير عرف الحقيقة عن الموظف ده بس علشان ما يفضحش نفسه قرر إنه يسيب الموظف في مكانه ويقنع الناس إنه كويس. أنا ضحكت وقلت له إني ما سمعتش وجهة النظر دي قبل كده. بعد كده قال لي إن فكرة الخبرة دي عذر العواجز اللي عايزين يفضلوا في أماكنهم على طول من غير ما يدوا فرصة للأجيال الجديدة. وبعد كده قال لي إن



هو لو ما كانش باباه مليونير، عمره ما كان حيقى ماسك منصب كبير زي اللي هو ماسكه في سنه ده. وقتها ومن غير ما أفكر سألتته عن سنه وهو قال لي من غير أي إحراج إنه عنده تسعة وعشرين. بعد كده سألني عن سني ووقتها عرفت إن أنا كنت غبية جدًا إني أسأله السؤال ده لأنه في الآخر ضرب في وشي. في اللحظة دي فكرت إنه عارف سني بس عايز يلاعبني أو إنه يمكن فعلًا ما يعرفش سني وعايز يعرف. بس هو عارف إن أنا صاحبة ليلي وليلى أكبر مني بسنة واحدة، فحتى لو هو فاكرني أذها يبقى هو أكيد عارف سني بالتقريب. عمري ما فكرت إنه ما يعرفش سن ليلي. لما قلت له سني وشه احمرّ شوية وحسيت إنه توتر جدًا. هو قال لي إنه كان فاكر إن ليلي أكبر من كده وقلت له إنها أكبر مني بسنة. وقتها هز راسه بهدوء وقال لي إنه فعلًا ما كانش يعرف سني وإنه كان فاكرني أكبر من كده بستين أو ثلاثة. وقتها عرفت إن كل حاجة اتغيرت وعرفت إني كنت هيلة إني أفكر إن واحد زيه وفي سنه ممكن يعجب بيا. وإذا كان فضل معجب بيا حتى بعد ما عرف سني، كنت حاعمل إيه وقتها؟ هل كنت حاقبل علاقة من النوع ده؟ مع واحد أكبر مني بأكثر من عشر سنين؟ وأنا ليه كنت عايزة أبقي على علاقة بيه؟ أنا ما اعرفوش، هو سمعته مش كويسة وشخصيته مختلفة عني تمامًا. أنا



كنت باحلم والحلم كان مسلي، بس أنا غلطت ودخلت نفسي في موقف سخيف ومالوش لازمة. أنا بعد كده قلت له إن أنا عايزة أمشي وهو قال لي إنه مش عايزي أزعل وإن سني مش مهم وإنه لسه عايز يساعدي وإنه فعلاً مقتنع إن أنا موهوبة، فشكرته تاني على ذوقه، فاتعصّب شوية وقال لي إن هو مش بيجاملني وإنه فعلاً مقتنع باللي بيقوله وإني لو احتجت مساعدة في أي حاجة أكلمه وإن أنا معايا ثمرته. وبعد كده قال لي إنه عازمني على العشاء وإني ما ينفعش أمشي من غير ما أتعشى معاه. وافقت واتعشيت معاه. وأنا أعدّ معاه لاحظت حاجة بسطتني جداً. طول الوقت وأنا أعدّ معاه كان في بنات رايحة حاية عمالة تبص لي وشايطين من الغيظ. أنا دلوقتي لما بافكر في اللي أنا عملته، حاسة إن أنا فعلاً كنت مسطولة أو في حالة جنان مؤقت. أنا لو حد شافني وقال لأهلي إن أنا كنت أعدّ لوحدي مع كمال رفعت، رجل سمعته زفت وأكبر مني بأكثر من عشر سنين، أنا مش عارفة إيه اللي ممكن يحصل. يا رب محدّش يعرفنا يكون شافني. أنا مش عارفة أنا ازاي عملت كده.



النهارده رجعت أثمرن ثاني. تمرين السباحة بيخليني أعرف أفكر. النهارده أنا فكرت في حاجات كثير، في شخصيتي وفي تصرفاتي وفي السجن اللي أنا عايشة فيه. أنا في الفترة اللي فاتت عملت حاجات كان لا يمكن أعملها من سنة. أنا عارفة إني كبرت كثير السنة دي وإن في حاجات كثير اتغيرت، بس مش هو ده السبب الحقيقي لتصرفاتي. أنا عارفة السبب الحقيقي. السبب الحقيقي هو إن أنا ابتديت أهوّر، أتصرف باندفاع، لأنني ابتديت أياس، أبتديت أحس إن في احتمال كبير إني لو ما اتجنتش شوية واتصرفت بتهور، حياي حثقف أو حتفضل زي ما هي لغاية لما أموت. أنا مش حاستحمل ده، مش حاقدّر أقبل الدور المطلوب مني ألعبه بالعافية. أنا مش عارفة حاهرب ازاي من السجن ده وازاي حاغيّر دوري في الدنيا، بس أنا باحاول بالرغم من إني حاسة إني حافشل، بس المحاولة هي الحاجة الوحيدة اللي فاضلة. أنا مش عارفة بقية الناس اللي في سني وفي أولى جامعة ييفكروا ازاي. هل كلهم بيعانوا من اللي أنا باعاني منه؟ أكيد فيه ناس ييفكروا زيي. بس هما قليلين. نادين باحس إنها لسه مش عارفة هي عايرة إيه، مرم مقتنعة إن الدنيا عبارة عن تحارب من غير هدف، باكينام



حلمها إنها تتحوز وتغلف ونيفين.. نيفين تفكيرها وطموحاتها  
مختلفة لأنها مش عايشة في مصر وده بيغير كل حاجة. أنا  
زملائي في الجامعة أغلبهم ماشيين كده مع التيار وخلاص،  
باحس إهم مش عارفين هما مين أو رايعين فين. أنا برضو كنت  
زيهم، بس أنا ما بقتش كده خلاص. أنا اتغيرت. زمن  
التحشيش والسطلة انتهى. بس أنا ليه مش مبسوطة؟ ليه مش  
حاسة بالأمل؟ في حاجة بتشدني لتحت، أنا حاسة بيها. في  
حاجة مش راضية تسييني في حالي.



ليلي كلمتي ووضحت لي إنها متضايقة مني جدًا. هي عرفت إن أنا اتعشيت مع كمال رفعت في (Le Jardin) وهي مش مصدقة إن أنا ما قتلهاش. أنا ما عرفتش أرد لأني لو كنت قلت لها إن أنا كنت ناوية أقول لها كنت حابقي بالكذب. أنا ما كنتش حاقول لحد. هي حسّت إن أنا خنتها وإنها ما كانتش متخيلة إن أنا ممكن أخبي عليها حاجة زي دي. هي قالت لي إنها كانت فاكرة إن أنا أطيب من كده وإن مش دي شخصيتي. أنا قلت لها إن أنا ما عملتش حاجة غير إن أنا اتعشيت معاه لما سألني وإن المقابلة كلها كانت قصيرة جدًا لأن هو أول لما عرف سني غير رأييه في كل حاجة. هي اتفاجأت بس قالت لي إن أنا كان المفروض أقول لها إن هو عزمي وعلى الأقل أخليها تقابلني هناك معاه حتى ولو بعد العشاء، وإن أنا غالبًا نسيت إن هي السبب إن أنا قابلته من الأول. قلت لها إن أنا عارفة، بس إن أنا ماخنتهاش لأنه مش صاحبها ولا خاطبها وإنه طلب يقابلني أنا وإن أنا قررت إني أقابله وإن أنا ندمانة على القرار ده، بس هو في الآخر كان قرار يرجع لي أنا وإن ليلي لو كانت في مكاني كان عملت نفس الحاجة. هي سكنت شوية وبعد كده قالت لي إن اللي أنا



باقوله ده حقيقي ما عدا حاجة واحدة، وهي إن لو كان كمال  
رفعت عزمها على العشاء، هي كانت حتقول لي ومش حتخي  
عليًا حاجة. أنا كنت عارفة إن ده حقيقي وإن هي ما كانتش  
حتخي عليًا، بس أنا ما قتلهاش لأني كنت خايفة إنها تزعل  
وطبعا ده كان تفكير غبي. هي بعد كده قفلت في وشي. أنا  
حاسة إن دي نهاية صداقتنا.



النهارده قابلت نيفين في بيتها. حالتها النفسية كانت وحشة  
أوي وفعلاً كان نفسها تقعد في مصر وقت أطول، بس للأسف  
ده مش حيحصل. هي كانت عارفة من أول لما جات إن  
زيارتها لمصر مش حتطول عن سنتين، بس ما كانتش متخيلة  
إنها حتبقى أقل من سنة. هي بتحب بلجيكا جداً ولها حياة  
وأصحاب هناك، بس هي برضو بتحب مصر وبتحب أصحابها  
اللي هنا. بس هي قالت لي إن الواحد ما يقدرش يحصل على  
كل حاجة في الدنيا. في بلجيكا في حياة هادية ونظام وفرص،  
وفي مصر في العشرة والأصحاب والذكريات. يا ده يا ده. هي  
حتسافر في آخر الشهر ومش عارفة حترجع مصر تاني إمتى.  
هي المرة دي ما عيطتش. أنا لما روحت البيت برضو ما  
عيطتش، بس أعدت أفكر إنني يمكن ما اشوفش نيفين تاني أبداً.  
أي حد في الدنيا بيقول إن في إحساس أوحش من الوحدة يبقى  
كذاب.



امبارح حلمت نفس الحلم ثاني. حلمت إني في مكان مهجور ومش قادرة أتحرك. اترفعت من على الأرض كأني عروسة وبعد كده النار ولعت تحتيا. المرة دي شوفت إن النار كانت على شكل دايرة وإن الدايرة حواليا. النار عليت جدًا وقربت مني. قبل ما تلمسني، فجأة نزلت ثاني على الأرض وبقيت جواً الدايرة. الدايرة ابتدت تصغر وابتدت أحس بحرارة النار وابتدت أعرق. حسيت بجلدي وهو بيتوسع، حسيت بحواجي وهي بتتحرق، ابتدت أصرخ. فجأة شفايفي اتقفلت لوحدها. أتلووت وشوفت إن في حد واقف ورايا، برأ الدايرة. ما قدرتش أشوف ملامحه، بس هو كان راجل، طويل، واقف في مكانه ما بيتحركش. كان حاطط صباعه على شفايفه، وبالرغم من صوت النار العالي، سمعته يقول لي "هشششششش". جسمي ولع. صحيت من النوم ولقيت نفسي عرقانة مياه. حلم غريب وبشع. والأغرب من كده إني حسيت ثاني بنفس الإحساس اللي حسيت بيه لما حلمت الحلم ده قبل كده. حسيت إنه ذكرى مش خيال، إن ده خلاص حصل وإنه كان حقيقة. في حاجة في الحلم ده أنا شوفتها قبل كده. إيه هي؟



النتائج طلعت. نجحت في كل حاجة، بس نمري مش كويسة أوي، مش أقل من الأغلبية بس مش أد المجهود اللي أنا عملته. أنا قتلت نفسي مذاكرة في القرف ده، بس الواضح إن الواحد مهما حاول في حاجة ما بيجهش مش حيحيب نتيجة، أو على الأقل مش حيحيب نتيجة كويسة. ده معناه دروس خصوصية تاني، معناه خناقات مع بابا على المصاريف، معناه وقت أكثر حاقضيه في مذاكرة القرف ده مع ناس تانية. أنا لازم استحمل لغاية لما أشوف حاعمل إيه.



باكينام لسه قافلة معايا. باباها قابل عمر وبعد إقناع فطيع وافق. هي طايّرة من الفرحة وبتقول إهمم عايزين يعملوا الخطوبة في يونيو اللي جاي. أنا فرحانة علشائها جدًّا ومستغربة إن باباها وافق على عمر. من الواضح إن باباها أطيب من ما أنا كنت فاكّرة وإن في الآخر أكثر حاجة كانت تممه هي سعادة بنته. أنا مش مصدقة إن باكي حتتخطب السنة دي. الوقت بيجري بطريقة غريبة، كأني في حلم.



حلمت نفس الحلم ثاني، بس المرة دي لما النار وصلت لي  
 وابتديت أتحرق، فجأة شوفت نفسي من بعيد واكتشفت إن  
 اللي موجودة جوا الدائرة تبقى مش أنا، بس مانيكان شبيهي  
 بالظبط. المانيكان كانت شعرها زيي بالظبط ولايسة الفستان  
 الأسود السواريه اللي أنا لبسته السنة الفاتت في فرح نورا.  
 المانيكان كانت بتتحرق ولما ابتدت تسيح، عينيها وسعت  
 وابتدت تصرخ كأنها حية. بصيت حواليا فشوفت واحد واقف  
 برّا دائرة النار، مديني ضهره. راجل لابس بالطو أسود وواقف  
 في مكانه ما بيتحركش، بيتفرج على المانيكان وهي بتتحرق  
 وبتسيح. أنا دلوقتي متأكدة إن أنا عارفة الرجل ده، متأكدة إني  
 شوفته قبل كده، غالباً من زمان، لأني حاسة إن الحلم ده كله  
 يبقى ذكرى. أنا لازم أحاول أعرف هو مين وفين المكان ده.  
 أنا لازم أعرف ليه الحلم ده بيتكرر.



أحمد في مصر. أنا لست عارفة من مريم. هو في أجازة من الجامعة لمدة أسبوع وجه علشان يشوف أهله. أنا مش عارفة أفكر ازاي. أنا حاسة إني مبسوطة بس خايقة. حاسة إني عايزة أعيط وأستحي. أنا عايزة أشوفه بس مش عايزاه يشوفني. هو واحشني جداً لدرجة إن قلبي بيوجعني لما بافكر فيه. بس أنا خايقة إني لما أشوفه أفقد السيطرة على نفسي وأحس باللي كنت باحس بيه زمان. أنا بقى لي تقريباً سنة باحاول أنسى وأكبت الأحاسيس دي. إيه الممكن يحصل لو شوفته؟ يا ترى اتغير؟ يا ترى أنا اتغيرت؟ حاشوفه ولا لا؟



أحمد كلمني وقال لي إنه عايز يقابلني بسرعة لأنه حيسافر  
مع أهله العين سخنة بعد بكرة، حيقعد يومين وبعدها حيرجع  
القاهرة ويسافر ثاني يوم. أول حاجة لاحظتها لما سمعت صوته  
إن ما فيش أي حاجة اتغيرت ما بينا، لسه بنفهم بعض بسرعة  
من غير ما نتكلم كثير وما فيش ما بينا إحراج. أنا طبعا يمكن  
يكون بيتيألي، بس أنا مش عارفة أنا كنت متوقعة إيه، كنت  
متوقعة تغيير شكله إيه. أنا مش حاعرف غير لما أشوفه. بكرة.



أنا قابلت أحمد في النادي. شكله ما اتغيرش كثير، هو بس قص شعره وملا شوية. هو كان طول عمره رفيع أوي، دلوقتي بقى جسمه طبيعي. أول لما قابلته منعت نفسي بالعافية إني أبوسه وسط الناس. أنا حسيت إن هو كمان منع نفسه. في الأول أعدنا شوية واتكلمنا عن كل حاجة، عن جامعته وعن (Chicago) وعن دراسته وفرقة الجديدة اللي هو عاملها مع زملائه في الجامعة. عن كل حاجة. هو بعد كده سألني عن أخباري وعن ليه ما بابتلوش (Emails) زي ما اتفقنا. أنا قلت له إن هو كمان ما بعثش وقال لي إن بعد الشهر الأولاني في الجامعة كل حاجة اتغيرت وحصلت بسرعة وإنه ما بقاش عنده وقت حتى يكلم أهله. وقال لي إن هو بعثلي رد بعد آخر (Email) أنا بعته، بس أنا اللي ما ردّتش بعد كده. أنا ما عرفتش أرد، بس قلت له إن أنا كمان اتشغلت في الجامعة وقرفها. هو قال لي إنه لما عرف إن أنا دخلت تجارة استغرب بس ما حبّش يتدخل. بس هو كان فاكراً، بناءً على كلامنا قبل ما يسافر، إن أنا كنت حاواجه أهلي وأقول لهم على رغبتني في التمثيل. قلت له إن أنا كنت على وشك إني أقول لهم، بس بعد ما هو سافر غيرت رأيي. سألني إذا كنت فعلاً غيرت رأيي



ولا هما اللي غيروا رأيي. قلت له إنهم ما يقدروش يغيروا رأيي  
لأنهم ما يعرفوش أصلًا. قال لي إن هو مش عايز يتخايق معايا  
بسبب الموضوع ده، بس هو خايف على مستقبلتي وسعادتي  
وإنه عايز يتأكد إن أنا مبسوفة قبل ما يرجع أمريكا. في  
اللحظة دي حسيت إن أنا رجعت تان لليوم اللي هو سافر فيه.  
كنت عايزة أقول له إن هو لو كان فعلاً خايف على مشاعري  
وسعادتي ومستقبلي ما كانش سافر من أساسه، بس طبعاً  
ماقدرتش أقول له كده لأنه كان حقيقى كلام قاسي وكان  
حفظلمه، لأن هو لازم يشوف مستقبله. هو شافني وأنا بافكر  
وعرف أنا بافكر في إيه وقال لي إنه لغاية النهارده ضميره بيأنبه  
إنه سابني لوحدي في مصر، بس أنا عارفة إن مافيش حاجة  
بإيده يقدر يعملها دلوقتي. قلت له إنه مش المفروض يحمل همي  
وإن أنا كبيرة دلوقتي وأقدر أخذ بالي من نفسي. هو قال لي إنه  
عارف إن أنا قوية وباستحمل، بس إنه كان نفسه إن الأمور  
تكون مختلفة. ما قلتش حاجة. بعد كده ركبت معاه العربية  
ولفينا شوية في وسط البلد والزمالك وبعد كده ركنا في شارع  
جانبي في المعادي. هو حضني جامد أوي وبعد كده باسني. في  
الأول ما كنتش عارفة أحس بإيه، بس بعد لحظة حرارة  
جسمه، ريحة شعره وطعم شفايفه.. كل حاجة رجعت لي تاني  
كأنه عمره ما سابني، كأني كنت معاه امبارح. أعدنا نبوس



بعض لغاية لما شفايفنا وجعتنا وبعد كده هو حط إيده على  
صدري وجسمي كله ابتدا يترعش وبوسنا بعض تاني. أنا  
حطيت إيدي على حجره وحسيت بيه، وفي اللحظة دي كنت  
عايزة يبقى جسمنا واحد، يبقى جسمي بيلمس جسمه، يبقى  
جزء منه. بس فجأة افتكرت إن في خلال كام ساعة حابقي  
لوحدي وإني ما اعرفش حاشوفه إمتى تاني. دخلت إيدي تحت  
قميصه وحسست على صدره وعلى بطنه وهو كمان حسس  
على جسمي. بعد كده بوسنا بعض لآخر مرة وقلت له إني  
عايزة أرجع البيت.



طول الليل امبارح كنت خائفة أنام لإني كنت عارفة  
حاحلم بأيه، كنت حاحلم الحلم اللي حلمت بيه لما عرفت  
لأول مرة إن أحمد حيسيبي ويسافر أمريكا. في الحلم ده أنا  
وهو بنعوم مع بعض في البيسين. إحنا الاتنين عريانين وحاضنين  
بعض، جسمنا واحد وإحنا بنغطس تحت المياه. لما بنغطس  
بنبوس بعض وبعد كده أنا باسلم جسمي له وهو بياخدني.  
بس أنا في الآخر نمت وما حلمتش بأي حاجة. أنا ندمانة على  
حاجات كتير. أنا ندمانة إني عمري ما نمت مع أحمد، إني  
عمري ما حاعيش معاه، إني مش حاكبر معاه، إني باحبه، إني  
باحس بالحاجات دي كلها، إن ضميري مش بيأنبني، إن أهلي  
ما يعرفونيش، إني مش ممثلة، إني مش سعيدة، إني مش جريئة،  
إني خائفة، إني جبانة، إني عايشة، إني في الحقيقة ميتة.



أحمد رجع أمريكا النهارده. كلمني قبل ما يسافر علشان  
يسلم عليا. أنا سلمت عليه وقلت له يعيش حياته وما يحملش  
همي. هو قال لي إنه مش عارف هو جيعمل إيه لما يخلص  
جامعة، بس يمكن يرجع مصر. أنا عارفة إن عمره ما حيرجع،  
هو مستقبله هناك وأنا في الآخر عايزاه يعيش سعيد، مش يتدفن  
هنا.

\*\*\*\*

وأنا راجعة من النادي النهارده حسيت إن حد بيراقبني. أنا  
كان بقى لي فترة كبيرة ما حسّتش بالإحساس ده، بس  
النهارده كنت متأكدة إن في حد ماشي ورايا. بس أنا ما  
قدرتش أشوفه، ما عرفتش ألاقى حد معين بيلاحقني. أنا حتى  
وقفت في وسط الشارع وطنشت المعاكسات والقرف علشان  
أشوف هو مين، بس هو ما ظهرش. أنا ليه متأكدة للدرجة دي  
إنه حيطهر قريب؟ أنا ليه حاسة إنه مش حيسيبي في حالي؟ هل  
أنا بالتخيل؟ هل كل دي هيووات؟ أنا مش متأكدة، بس حاسة  
إن أنا فعلا في خطر. أنا لازم ما اشكش في إحساسي، أنا  
عمري ما حسيت قبل كده إني في خطر وطالما باحس  
بالإحساس ده دلوقتي يبقى يمكن الخطر حقيقي. بس أنا برضو  
أعصابي تعبانة ولازم أهدي من نفسي. أنا لازم أجيب المهدي  
اللي قال لي عليه الدكتور عزمي ولازم أهتم بصحتي. يمكن  
المهدي ده يساعد، يمكن يخليني أقدر أفهم إيه اللي بيحصل لي.



## ٩ مارس

أنا ابتديت أخذ الدواء فعلًا هذّي أعصابي. يا ريتني كنت أخذته من الأول، كان ممكن يساعدني من زمان. أنا فعلًا أعصابي مضغوطة. أنا محتاجة إني أهدي وأركز. أنا مش حاروح التمرين الأسبوع ده. كفاية عليًا الدروس الخصوصية. الأسبوع الجاي لما أحس إني أحسن حارجع تاني للتمرين.



قابلت باكينام في النادي. أول مرة أشوفها من فترة. هي كانت مشغولة جدًا مع خطيبها. بس هي كلمتني امبارح وقالت لي إنها عايزة تقابلني في النادي وإن أنا وحشتها جدًا. أنا فرحت أوي لأن هي كمان وحشتني جدًا، بس أنا ما كنتش عارفة أكلمها إمتى لأن أنا عارفة إنها وراها مائة ألف حاجة وكنت خايفة إني أخرجها أو أضغط عليها. في الحقيقة أنا كان نفسي أقابلها قبل كده لأن كان عندي حاجات كتير عايزة أقولها لها. لما شوفتها النهارده قالت لي إن أنا شكلي تعبانة وخسّة جدًا. قلت لها إن ده غالبًا من التمرين، بس أنا في الحقيقة مش منتظمة في التمرين بقى لي فترة، بس أنا ما كنتش عايزاها تعرف. هي قالت لي إن عينيا تعبانة وسألتني إذا كنت محبة حاجة عنها. قلت لها إن أنا بأعاني من ضغط عصبي خفيف وإن أنا روحت للدكتور وإداني مهدئ وإني دلوقتي أحسن. هي قلقت جدًا وسألتني إذا كان كل ده بسبب أحمد. قلت لها إن رجوعه لمصر كان فعلًا غير متوقع وإني اتضايقت لما شوفته، بس أنا كان بقى لي فترة مضغوطة ومرهقة من قبل ما هو ييجي وإني في الآخر حصل لي (Failure). باكينام قالت لي إن أنا كان المفروض أقول لها على كل ده من زمان وإنها



زعلانة مني جدًا لأني خبيّت عليها كل الحاجات دي. قلت لها  
إن أنا ما كنتش عايزة أشغلها على الفاضي، بجانب إني أخذت  
بنصيححتها وروحنت للدكتور وحتي عملت رنين مغناطيسي وإن  
كل حاجة طلعت كويسة وإني بس مرهقة شوية ومحتاج  
راحة. قالت لي إن من هنا ورايح لازم أكلمها باستمرار  
وأبلغها أخباري أول بأول وإني لو ما عملتشي كده هي  
حتلاحقني بالتليفون وإذا ده ما بتحش حتطب عليا في البيت.  
إحنا الاتنين ضحكنا وبعد كده حكينا لبعض كل أخبارنا، ما  
عدا حكاية إحساسني بإن في حد بيلاحقني والحلم اللي بيتكرر  
كل ليلة. أنا حسيت إن دي حاجة لازم أواجهها لوحدي لإن  
محدث حيفهم ولإني ما عنديش إثبات. لو فعلًا فضل ما عنديش  
إثبات غير كلمتي لفترة طويلة حيقى التفسير الوحيد اللي  
الفاضل إن أنا مجنونة ودي حاجة أنا مش عايزة أواجهها  
دلوقتي. لازم اتأكد الأول.

\*\*\*\*

ماما دخلت لي الأوضة النهارده و قالت لي إنها عايزة تتكلم  
معايا. ماما ما بتعملش ده كثير. قالت لي إنها حاسة إن أنا مش  
على طبيعتي و إن أنا شكلي تعبان و إنها قلقانة عليا. قلت لها  
إن أنا مضغوطة في الجامعة و الدروس و إني محتاجة شوية  
راحة. قالت لي يبقى لازم أبطل التمرين و إني كبرت على



الحاجات دي خلاص و إني واضح إني مش حمل كل الجهد ده. كنت حاقول لها إني بقى لى أسبوعين ما باروحش التمرين بس لحقت نفسى لأنى لو كنت قلت كده ماكتتش حاعرف أخرج من البيت خالص وسط الأسبوع. و بالرغم من إن أنا فعلا مابقتش بأخرج كتير زي الأول، بس أنا مش عايزة الحرية دي تاخذ منى. ماما فضلت أعددة معايا شوية من غير ما تتكلم و حطت أيديها على راسى و حسست على شعرى، حاجة هى برضو ما بتعملهاش كتير. بس هو إحساس جميل، فكرنى بزمان لما كنت صغيرة و ماما ماكانتش لسه إتغيرت و بقت جافة و عصبية و على طول أعددة في أوضتها أو في الصالة بتقرا مجلات و جرائد أو بتتفرج على التلفيزيون. هى كانت زمان مختلفة، كانت حساسة و دمها خفيف و بتضحك كتير و بتتكلم معايا باستمرار. بس فجأة، من حوالى خمس سنين، هى أتغيرت. بابا طول عمره في حاله، من الشغل للبيت و من البيت للشغل. مالوش دعوة بحاجة و ما يعرفش تقريبا أي حاجة عنى غير سنى و إني بأتمرن سباحة. هو دائما يقول لماما إن الرجل واجبه إنه يشتغل و يوفر لعائلته الأكل و الشرب و اللبس، و الأم دورها إنها تاخذ بالها من البيت و الولاد. بعد شوية ماما باصت لى في وشى و قالت لى إنها عارفة. أنا قلبى وقف في صدرى و مابقتش عارفة أفكر ازاى. عارفة إيه؟ أول



حاجة جات على بالى إنها عرفت إن أنا باكتب مذكراتى و إنها قرأتها. بس بعد لحظة خدت بالى إنها شكلها قلقان بس مش متعصب. لو هى كانت قرأت مذكراتى كانت حتبقى شايطة و بتصرخ فيا. لآ، أنا حسيت إنها بتتكلم عن حاجة تانية. قالت لى إنها عارفة إن أنا معجبة بولد و إنى فى ما بينى و ما بينه مشكلة و إن هو ده سبب تعب أعصابى و إنى ماباكلش كويس. فى اللحظة دي أنا فعلا اتفاجأت. ماكنتش أنجىل إن ماما ممكن تفكر بالطريقة دي و إن ده يكون رد فعلها لو عرفت حاجة زى كده. أنا ماردتش و سبتها تتكلم. قالت لى إنها حاسة بيا و بأنى بأمر بمشكلة عاطفية و إن هى ست برضو و كانت بتمر بحاجات زى دي و هى فى سنى و إنه طبيعى إن البنات تحب و إنه للأسف طبيعى إن حد يكسر قلبها. ماردتش، فقالت لى إن أنا ممكن أقول لها أى حاجة و إنها حتفهم. فى الأول أترددت و بعد كده قلت لها إن مش هو ده السبب و إن أنا متضايقه من حاجات كتير. قالت لى إن هى عارفة إن ده واحد منهم و إنها عايزة تعرف التفاصيل و يمكن تساعدنى. فى اللحظة دي حسيت إن نيراً صوتها أتغيرت و إنها أبتدت تنعصب و تقلق، و وقتها فهمت إنها خايفة إن أنا أكون متورطة جامد مع ولد و هى ماتعرفش حاجة و هى قلقانة إن الولد ده ممكن يكون بيستغلنى أو بيضحك عليا. قلت لها إنه



ماfish ولد في حياتي و إن فعلا كان في حد أنا كنت معجبة  
بيه زمان، بس الموضوع انتهى خلاص. ماما ابتسمت ابتسامة  
مصطنعة و حاولت تمثل إنها هادية و بعد كده سألتني أنا ليه  
ماقلتلهاش لما أنا كنت مرتبطة بحد، فقلت لها إن أنا ماكنتش  
مرتبطة بحد و إن أنا كنت معجبة بحد و الموضوع دلوقتي  
إنتهى. قالت لي إن لو دي الحقيقة يبقى إيه اللي تعبنى كده،  
فقلت لها إن أنا فعلا مضغوطة في الجامعة و في المذاكرة  
وبأفكر في مستقبلي و في حياتي و في حاجات كتير. كان  
نفسى أقول لها إن أنا عايزة أسيب الجامعة و أبقى مثلة، إني  
يمكن أكون أبتديت أتجنن، إني خايفة أبطل أأخذ المهدئ  
لاحسن أأفكار. بس قبل ما أقرر إني أقول أي حاجة، ماما فجأة  
بعدت عني و بمنتهى الجدية قالت لي إن أنا أتخسدت، إن بنت  
جميلة و نبيهة زيي أكيد أتخسدت من حد غيران مني و إنها  
حترقيني و تطلعني من اللي أنا فيه. لما قالت كده باصت لها  
وضحكت و قلت لها إن هي صح و إن أنا فعلا أتخسدت.  
خرجت من الأوضة و قالت لي إنها حتجيب البخور. بعد ما  
خلصت و مشيت، قفلت باب أوضتي و نمت و حلمت نفس  
الحلم، الحلم اللي بأشوف نفسي فيه ميتة.



أنا النهارده روحت أتمرن تانى. الجو بقى أدفى شوية و لما  
نزلت المياه حسيت إن كل مشاكل الدنيا أتبخرت في الهواء. أنا  
كان المفروض أرجع للتمرين من بدرى، بس أنا ماكنتش عايزة  
أنزل من البيت. بس بعد تمرين النهارده أنا مافيش حاجة لازم  
تمنعني تانى. التمرين و المياه هما الحاجتين الوحيدتين اللتي بيسعدوني  
دلوقتي.



أنا في حد بيلاحقني. أنا حسيت بيه تاني النهارده و أنا  
بأتمشى في الشارع. لما أتدورت تحت حد بيدخل شارع جانبي  
بسرعة، رجل طويل لابس بلطو أسود. ماشوفتش وشه بس  
شكله كان شبه الرجل اللي في الحلم. أنا دلوقتي بس عرفت إن  
في صلة ما بين الحلم و الشخص اللي بيلاحقني. بس ازاي؟ إيه  
دخل الحلم بالحقيقة؟ ازاي أنا شوفت الرجل ده في الحلم  
الأول؟ ليه الحلم ده دائما بأحس إنه ذكرى، حاجة حصلت  
زمان و مش خيال؟ أنا إيه المتورطة فيه ده؟ أنا مش عارفة أفكر  
ازاي. حلمي فعلا ممكن يكون حقيقة؟ فيه حد فعلا عايز  
يقتلني؟ مش معقول، أنا أكيد بأتحيل. أكيد.

\*\*\*\*

أنا كلمت الدكتور عزمي علشان أقول له على اللي  
بيحصل، بس مالفقتوش. سبت له message على  
الanswering machine وقلت له يكلمني على الموبايل  
أول لما يسمع الرسالة و إني فعلا محتاجة مساعدته. أنا لازم  
أقول لحد اللي بيحصل. أنا ممكن أقول لباكينام، بس ح أقول لها  
إيه بالظبط؟ أنا لست ماعنديش أي إثبات و لو قلت لها إن أنا  
حاسة بالإحساس ده بقى لى فترة طويلة حتقول لى إن أنا



بأنخيل لأن لو في حد فعلا كان بيلاحقني طول الفترة دي كان  
زمان حد حد باله أو كان الشخص ده أذاني خلاص  
و ماكانش حيستني كل ده. أنا عارفة إن ده كلام منطقي، بس  
اللي أنا حاسة بيه و مش قادرة أثبت إنه حقيقة إن الشخص ده  
مستننى، مستنى الوقت المناسب. ميعاد هو محدد و أنا ماعرفوش.  
هو عايز يموتنى. أنا دلوقتي متأكدة من ده. أنا لازم أقول لحد.  
أنا ممكن أقول لنيفين. أنا نسيت إن نيفين رجعت بلجيكا  
خلاص. بس أنا لازم أقول لحد. للبوليس؟ طبعا مش  
حيصدقوني، حيقولوا عليا مجنونة لأنى ماعنديش أي إثبات  
و ماتعرضتش لأي خطر، حيقولوا عليا بنت هبله بتتخيل  
حاجات و إنهم مش فاضيين للكلام ده. بس أنا لازم أقول  
لحد، لازم. أنا خائفة، أنا حاسة إنى حاتنقى. أنا ممكن أقول  
لنادين، أخوها ظابط في المباحث، أحمد، أحمد فهمى. هى دائما  
بتقول إنه شاطر أوى و بياخد القضايا الصعبة و إنه دائما  
مستعد يسمع أغرب القصص. أيوه، هو ده. أنا لازم أقول له.  
أنا لازم أكلم نادين. بس أقول لها إيه بالظبط؟ لو قلت لها  
القصة زي ما هى ممكن تفنكر إن أنا مجنونة. أنا مش عارفة  
أعمل إيه. أنا لازم أفكر. لازم أعمل حاجة. أنا تعبانة أوى.



أنا قررت إن الموضوع كله تهيؤات. أنا بقى لى يومين  
ماحلتمتش بحاجة و بأروح التمرين و ما باحسش بجد ماشى  
ورايأ أو بيراقبني. أنا دلوقتي منتظمة على الدواء و حاسة إني  
فعلا أحسن. أنا لازم أعيش حياتي و أواجه الواقع. أنا أهلى  
مسافرين بكرة لأقاربنا في الفيوم و حيرجعوا بالليل. أنا بكرة  
حأقعد طول اليوم في النادي و حأتمرن و حأجرى و حأرجع  
البيت متأخر. حتبقى أحسن حاجة ممكن أعملها.



أنا حأموت بكرة. أنا دلوقتي عارفة إن اللي بيمشي ورايا  
عايزني أموت. هو مش عايز مني حاجة غير اني أستسلم، هو  
عايز يسيطر عليّ و ياخذ روحي. أنا دلوقتي عرفت الحقيقة  
وعرفت إن مافيش منه مفر.

أنا النهارده روح النادى و قضيت يوم جميل في التمرين  
وفي السباحة وقابلت زمايلي من فريق السباحة، ناس  
ماشوفتهاش من زمن. أعدنا نتكلم عن كل حاجة وعن الجامعة  
وعن مين أنخطب و مين سافر و مين سقط... كل حاجة. بعد  
كده، الساعةثمانية، حسيت إن تعبانة أوى من كتر التمرين  
وقررت إن أروح. طلعت برّا النادى و أتمشيت شوية و بعد  
كده وقفت أخذ تاكسى. فجأة حسيت إن في حد واقف  
ورايا، ببص لى. اتدورت و مالقتش حد. شوفت تاكسى  
جاي من بعيد و كنت لسه حاشاور له لما سمعت حد بينادي. اتدورت.  
لما فتحت عيني بعد كده لقيت نفسى في حنة  
مهجورة، خرابة. ما كنتش عارفة أنا فين و لا وصلت هنا  
ازاي. بصيت على نفسى و لقيت إن أنا لابسة الفستان الأسود  
اللي أنا بالبسه في الحلم، اللي أنا بالبسه لما باتحرق، لما بأموت.  
حاولت أقوم بس ما قدرتش، كأني مربوطة. بس أنا ماكنتش  
مربوطة، كنت مشلولة. بعد كده سمعت حد بيمشي ورايا  
وبيولع كبريت. حاولت أصرخ بس برضو ماعرفتش، شفايفي



مارضيتش تتحرك. الشخص وطا جننى و ماقدرتش أتدور  
وأشوف وشه بسبب شللى. قرب منى و قال لى فى ودنى إن أنا  
مش حأموت النهارده، إن أنا حأموت بكرة. رمى الكبريت  
وشوفت الأرض كلها بتولع حواليا فى شكل دايرة، زى الحلم.  
بس الدايرة ما أكملتتش، النار خدت شكل نص دايرة. النار  
وقفت قبل ماتلمس رجلى بشير أو أتئين. حاولت أصرخ تانى  
و أبتديت أعرق من حرارة النار. بعد كده سمعت صوته فى  
راسى، بيرن فى دماغى، و قال لى كلمة واحدة. إننى. أغمى  
عليا. صحيت و لقيت نفسى فى السرير، فى أوضتى، فى بيتى.  
حاولت أحرك إيدي و لقيتها بتتحرك. قمت من على السرير  
وبصيت على نفسى و لقيت إن أنا لابسة قميص النوم. لقيت  
شنتطى مرمية جنب السرير. فتحتها و لقيت جواها الفستان  
السواريه الأسود. طلعت من الشنطة و فردته على السرير. لقيته  
متوسخ، كله تراب و ديله محروق كأن فى نار لمسته بس  
أتطفئت بسرعة قبل ما تحرقه كله، قبل ما تحرقنى. وقتها عرفت  
إنى ماكتتش باحلم، إن كل حاجة حصلت كانت حقيقة.  
عرفت إن أنا مش مجنونة، إن فى حد عايز يقتلنى. بس ليه؟  
مين؟ أنا حاسة إنى فى كابوس، إنى لازم أصحى، إن لا يمكن  
ده يكون بيحصل، إن أنا مش لوحدى فى الدنيا، مش لوحدى  
قدام الشر ده. بس أنا عارفة إن حأموت قريب، فى خلال  
ساعات، مافيش حاجة أقدر أعملها. هو حيقتلنى، حيولع فى  
جسمى. أنا حأموت جوا الدايرة. أنا عايزة أموت و لا لأ؟ أنا



فعلا عايزة أموت؟ مش عارفة. مش عارفة أفكر. عايزاه يبطل يتكلم في غنى، مش عايزة أسمع صوته أكثر من كده. بس أنا عارفة صوته، عارفة صوت الرجل ده. عارفاه كويس. بس مش قادرة أفكر هو مين. أنا دلوقتي أفكرت حاجة كمان، حاجة هو قالها لي و أنا جوا الدائرة. قال لي إن أنا حأموت الأول و بعد كده ليلي. ليلي. هو عايز يقتل ليلي. هو عايز يقتلها ليه؟ عايز يقتلني ليه؟ أنا وقتي خلاص أنتهي. أنا لازم أعمل حاجة. أنا حاسة بسيطرتي على نفسي بتروح هو هو جوايا هو في دماغى هو في الأوضة لأ أنا لازم ألحق أنا لازم أعمل حاجة النار حتولع أنا حأموت في خلال دقائق الساعة عدت ١٢ هو قال إن أنا حأموت بكرة أنا دلوقتي في بكرة اليوم الجديد بدأ أنا لازم أعمل حاجة أنا أنا حاجي مذكراتي أنا لازم أنقذها من الحريقة لازم حد يشوفها لازم حد يعرف أحمد فهمي الظابط هو حيعرف يعمل إيه أنا حاسة بوجع رهيب النار أبتدت تظهر أنا شايفة الدائرة أنا لازم أخببها لازم أخببها الدائرة أكتملت

(نهاية مذكرات نادية سالم)



(من صفحة الحوادث، جريدة ----- ٢٣\ مارس)

مصرع طالبة جامعية في حريق غامض بغرفتها

كتب- أحمد فؤاد:

لقت طالبة جامعية مصرعها في حريق بغرفتها بينما أصيب والديها بإصابات طفيفة أثر محاولتهما لإنقاذها.

و كان المقدم ----- مشرف غرفة عمليات مطافى الجيزة قد تلقى بلاغا بنشوب حريق في عمارة سكنية بشارع عبد العزيز ال سعود بالمنيل. فتوجهت على الفور سيارة إطفاء للموقع بأشراف اللواء ----- مدير الإدارة العامة للدفاع المدني و الاطفاء بالجيزة، حيث تبين مصرع طالبة جامعية و هى نادية سالم (١٨ سنة) أثر احتراقها في غرفة نومها. و تمكن الفريق من إخماد النيران قبل إندفاعها لباقي المبنى. و لكن بعد الانتقال و الفحص لم يتمكن فريق الخبراء من إيجاد سبب واضح لنشوب الحريق في غرفة نوم الضحية، فتم إبلاغ اللواء ----- مدير الإدارة العامة لمباحث الجيزة بوفاة فتاة في ظروف غامضة في حريق بالمنيل و أمر اللواء بإخطار النيابة التى تولت التحقيق...



أحمد خليفة كاتب و مخرج مصري.

للتواصل مع الكاتب:

**ahmed@wingrave-film.com**







